

et ass op jidfer Fall een, deen dat Ganzt muss bezuelen! Ech weess elo net, ob juristesche Recours kënne komme vun der europäescher Kommissioun, an vu vum deem Rapport, géint de lëtzebuergesche Stat, respektiv géint de Fonds du Kirchberg. Mir bleiwen also do vläicht nach am Vaguen a mussen ofwaarden, wéi den Dossier évoluëiert!

Wou ech awer net ka mat Iech d'accord sinn, Mme Minister, dat ass, wann Der sot, datt déi lëtzebuergesch Cour des Comptes - déi fréier Chambre des Comptes - eng Kontroll kéint exercéieren iwwer alles dat, wat iwwert d'Loi de garantie finanziert gëtt.

(Interruptions diverses)

Ma dach! Ech muss awer hei exposéieren, wourëm et geet!

(Interruptions diverses)

Ech wëll just nure soen, datt dat no schrëftlechen Aussoe vum President vun der Cour des Comptes net méiglech ass! Dofir froen ech, ob...

(Interruption)

...mer hei awer net sollten deen Dossier nach eng Kéier nei vun der Regierung iwwerdenken a kucke loos-sen. Ech hunn Akt geholl dovun, datt Der an Zukunft d'Loi de garantie wëllt méi iwwerwaachen. Dofir: Soll een net eng Modification législative virhuelen, déi kloer an däitlech géif eng Kontroll vun eiser Cour des Comptes erméiglechen, bei Finanzementer iwwert d'Loi de garantie?

M. le Président.- D'Mme Minister huet d'Wuert.

Mme Erna Hennicot-Schoepges, Ministre des Travaux publics.- Ech kann aus dem Här Henckes senger Interventioun do just eng Fro eraushéieren. Dat ass d'Fro,...

(Interruptions)

...wee beim Dépassement vum Devis géif bezuelen.

Do kann ech dem Här Henckes soen, datt fir de Moment eng Eenegung besteet tëscht dem Lëtzebuerger Stat an der Cour de Justice, well déi jo Client ass, an déi huet gebaut kritt, wat se gefrot huet. Do besteet eng Eenegung, mat Ausnam vun engem Litige, dee sech ëm d'Strooss handelt, déi fir d'Zoufart gemaach ginn ass. Déi Strooss, déi fir d'Zoufart gemaach ginn ass zur Cour, gëtt nämlech net nëmme vun de Leit vun der Cour benotzt. Déi gëtt och vun anere Leit benotzt.

Dat ass nun awer deen eenzege Litige, deen nach besteet. Da sinn nach fënnef Milliounen op deem ganze Chiffer, wou och nach verhandelt gëtt. Zur Zäit ass also d'Lëtzebuerger Regierung mat hirem Client eens iwwert de Coût, virausgesat datt elo d'Cour de Justice vun hiren Institutiounen, vun hirem Budgetsautoritéit, och déi Suen do kritt, fir ze bezuelen. Ech mengen, wann een de Bericht noliest, deen d'Cour als Äntwert op déi Bemierkung vum der Cour des Comptes gëtt, da liest dat sech jo och do eraus!

M. le Président.- Domat wier dee Punkt ofgeschloss. Mir kéimen elo zur Diskussioun vum Projet de loi 4562 iwwert déi finanziell Studiëbäihëllefen.

Et hu sech schonn ageschriwwen: déi Häre Wiseler, Fayot, Bettel, Henckes, Garcia an Hoffmann.

D'Wuert huet elo de Rapporteur vum Projet, déi honorabel Mme Nelly Stein.

3. Projet de loi 4562 concernant l'aide financière de l'Etat pour études supérieures

Rapport de la Commission de l'Enseignement supérieur, de la Recherche et de la Culture

Mme Nelly Stein (CSV), rapporteur.- Här President, Dir Dammen an Dir Hären, de Projet de loi 4562 gouf schonn de 26. Abrëll 1999 vun der Mme Erna Hennicot-Schoepges deponéiert. Mir wëssen awer, dass dono d'Zäit vun de Chamberwale komm ass, a vläicht war et gutt, dass mer de Projet do net méi ganz schnell duerchgebaatscht hunn, dat ëmsou méi, well och nach keen Avis vum Statsrot do war.

Ech mengen, hei huet een näischt dobäi verluer, wann ee gewaart huet, well de Januar 2000 huet d'Regierung nach Amendementer zum Projet abruecht, d'Kreditter goufen nach massiv erhéicht, an an der Kommissioun - dat war dunn d'Commission de l'Enseignement supérieur, de la Recherche et de la Culture - hate mer dann och déi néideg Rou an Zäit, fir de Projet duerchzehuelen. Dat hu mer och - dat muss ech soen - an enger ganz guder Entente gemaach. Do war et nämlech sou, dass een op deen anere gelauscht huet, een ass op deem anere seng Proposen agaangen, an et gouf och all Propos diskutéiert.

Dofir wëllt ech vun dëser Plaz aus der Mme Minister an de Mataarbechter aus hirem Ministère ganz härelech merci soen, dass se souvill Gedold haten, fir eis noze lauschten an och nach eise Propositionen a Wënsch Rechnung ze droen. Och alle Memberen aus der Kommissioun e ganz häreleche Merci fir déi konstruktiv Mataarbecht.

M. Robert Garcia (DÉI GRÉNG).- Et ass gär geschitt!

Mme Nelly Stein (CSV), rapporteur.- Elo zum Projet de loi.

Eis Jugend ass eis Zukunft.

M. Robert Garcia (DÉI GRÉNG).- Ah, merci!

M. Camille Gira (DÉI GRÉNG).- Et ass léif, dass Der op eis kuckt!

(Hilarité)

Mme Nelly Stein (CSV), rapporteur.- Et ass jo awer nëmme normal, Här Gira!

Dësen oft vu Politiker gebrauchte Saz därfer awer net einfach eng Floskel sinn, mä muss dozou leeden, eiser

Jugend déi beschtt Ausgangspositioun ze schafen, mat där se kënnen hir Zukunft ugoen.

De Projet de loi, deen eis hei virläit, behandelt e Beräich, wou et extrem wichteg ass, dass d'Politik de richtege Kader schafft. All Land brauch Universitäre, an och Lëtzebuerg. Mä Lëtzebuerg huet der am Verglach mam Ausland net genuch! Elo ass et un de Politiker, also un eis, fir déi néideg Bedingungen ze schafen, fir dass sech hei eppes ännert. Dee virleiende Projet de loi ass e Schrëtt an déi richteg Richtung.

D'Fuerderunge vun eisem Aarbechtsmaart ginn ëmmer méi spezifesch. D'Entreprise an d'Administration verlaangen ëmmer méi spezialiséiert a qualifizéiert Personal. Et stinn awer net ëmmer genuch Leit mat engem Unis- oder Héichschoulofschloss zur Verfügung. E groussen Deel vun den Universitäre hei am Land besteet elo schonn aus Frontalieren oder Leit, déi sech just fir eng begrenzten Zäit hei zu Lëtzebuerg ophalen.

Dëst dréit wuel zur Dynamik an zur Diversitéit vun eiser Bevëlkerung an eiser Ekonomie bäi, mä et werft awer och d'Fro op vun de Chancë vun de Lëtzeburger Universitäre an Net-Universitäre op eisem Aarbechtsmaart. Hei, just hei, muss sech eppes doen. Eng Reform vun der staatlecher Finanzhëllef ass wuel keen "Allheilmittel", mä trotzdem e wichtigen Aspekt vun deem Problem.

Lëtzebuerg muss senge Studenten déi néideg finanziell Mëttelen zur Verfügung stellen, déi hinnen et erlaben, an uerdentleche Konditiounen ze studéieren. Dëst géllt ëmsou méi, wou de groussen Deel vun eise Studenten op auslänneschen Unien ageschriwwen ass. D'Käschte vun engem Studium si fir si deementsprechend méi heich, vill méi héich, wei fir Studenten, déi an hirem Heemechtsland bleiwen.

Op Basis vun der aktueller Législatioun profitéieren ongeféier 4.200 Studente vun der finanzieller Hëllef vum Stat.

(Coups de cloche de la Présidence)

Merci, Här President!

Den Total vun de Lëtzeburger Studente kann op ongeféier 7.000 geschat ginn.

Déi jëtzege Gesetzgebung dréit awer net méi alle Situatiounen Rechnung a léisst eng Réi vu Problemer bestoen. Dofir soll se duerch eng nei ersat ginn, déi der Zäit ugepasst ass.

D'finanziell Hëllef vum Stat besteet ënner Form vu Boursen, Prêten - Prêten ouni oder mat Zënsen -, déi awer vum Stat subventionéiert ginn, an ënner Form vu Primes d'encouragements.

Ier ech an d'Detaillier vun deem Projet aginn, wëll ech awer kuerz drun erënneren, dass déi finanziell Studienhëllef e feste Bestanddeel vun eiser Schoulpolitik ass. Mir erfëllen nämlech mat deem Gesetzesprojet ee vun den Opträg vun der Lëtzeburger Verfassung. Am

Artikel 23 vun eiser Constitutioun steet geschriwwen, an ech zitieren: "La loi prévoit, selon des critères qu'elle détermine, un système d'aides financières en faveur des élèves et étudiants". Kaum en anert Land huet sou eng Dispositioun. Et ënnersträicht d'Bedeutung, déi mir der finanzieller Studienhëllef bäimoossen.

Här President, Dir Dammen an Dir Hären, déi éischt Innovatioun vun deem Projet de loi ass eng Redefinitioun vun der Notioun vun den Etudes supérieures. Wéi scho gesot studéieren déi meescht vun eise Studenten am Ausland, hunn also en auslänneschen Diplom. Et geet also drëm, fir d'Lëtzeburgerer Législatioun där auslännescher unzepassen. Domat anticipéiere mir eng geplangten europäesch Harmoniséierung vun den Diplomer.

Dës Harmoniséierung gouf 1998 initiéiert am Kontext vun de Feieren zum 800. Gebuertsdag vun der Sorbonne. Dës Projekte goufen duerno, am Juni 1999, zu Bologna weidergefouert. Mir stellen och e Parallelismus hier mat eiser Gesetzgebung vum 17. Juni 1963 iwwert d'Inscriptioun am Registre des titres d'enseignement supérieur.

Den Artikel 1 vum Projet de loi gëtt eng dräifach Definitioun vun den Universitätsstudien:

- éischters déi Studien, déi an 3 Zyklen organiséiert sinn;
- zweetens déi Studien, déi an zwee Niveaue lafen, eng pré- an eng post-Lizenz, an
- drëttens d'Studien op enger Héichschoul, déi an engem Zyklus funktionéieren.

Mat dëser dräifacher Definitioun droe mir der Diversitéit vun den Diplomer Rechnung. Esou ginn zum Beispill franséisch Lizenzen a britesch "bachelor" mat abegraff. Et handelt sech hei ëm Diplomer, déi een no engem Zyklus vun 3 Joer kritt, déi e vollstännegen Universitätszyklus ofschléissen an deemno och am Register vun den Titres d'enseignement supérieur ageschriwwen kënnen ginn.

An deem Kontext wëllt ech och nach e puer Wierder zu de Bénéficiaire vun der staatlecher Finanzhëllef soen. Och op deem Plang gouf den Text moderniséiert. Et sinn nämlech net nëmmen d'Lëtzeburger, déi an de Genoss vun der Finanzhëllef komme kënnen, mä et kommen des Weideren a Fro: d'EU-Bierger, déi zu Lëtzebuerg wunnen; d'Flüchtlingen, deenen de Statut vum Réfugié politique ënnert der Genfer Konventioun zouerkannt gouf, an d'Leit aus Drëttstaten, déi säit 5 Joer hei wunnen an en Diplom kënnen virweisen, deen equivalent mat eise Premièresdiplom ass, also mam Bac oder mam Bac technique. Ënnert dës Drëttstate falen och d'Memberstate vum europäesche Wirtschaftsraum, déi net Member vun der Europäescher Unioun sinn, also Island, Liechtenstein an Norwegen.

Dës Definitioun ass méi breet wéi déi vum Projet de loi a senger ursprüngelecher Form. Et huet eis awer an der Kommissioun vum Enseignement supérieur wichteg geschéngt, fir dem Statsrot sengen Observatiounen Rechnung

nung ze droen an den Text an dësem Sënn ze reformuléieren.

Des Weidere gëtt de maximale Montant vun der Finanzhëllef, deem e Student ka während engem akademesche Joer kréien, op 16.350 Euro eropgesat. Dëst entsprécht enger Augmentatioun vun 20%. Domat bleift deem néidege Spillraum bestoen, mat deem deene verschidde soziale Situatiounen ka Rechnung gedroe ginn. De Spillraum, deem der Regierung ënnert der aktueller Gesetzgebung zur Verfügung steet, ass iwwer Joren ëmmer méi kleng ginn.

Dëst ass dorop zréck ze féieren, datt den effektive Montant vun der Finanzhëllef ëmmer méi no un den theoreteschen, vum Gesetz festgeluegte Maximum erukomm ass. Déi Augmentatiounen, déi hei festzestellen sinn, erkläre sech zum Deel duerch déi steigend Frais d'inscription op den Unien.

Här President, si schwätze méi haart wéi ech. Ech hu Schwieeregkeeten, fir mech selwer ze héieren.

M. le Président.- Ech géif ëm Är Opmierksamkeet bieden!

Mme Nelly Stein (CSV), rapporteur.- Et muss ee sech bal entschëllegen, datt een d'Leit hei stéiert!

M. le Président.- Ech géif also nach eng Kéier drëm bieden nozelauschteren, fir sech e kloert Bild ze maachen, iwwer wat herno ofgestëmmt gëtt! D'Mme Stein fiert elo weider, an déi aner si roueg!

Mme Nelly Stein (CSV), rapporteur.- Merci, Här President. De Montant vun der Finanzhëllef an d'Opdeelung vun dësem Montant tëschent enger Bourse an engem Prêt hänkt souwuel vun der finanzieller a sozialer Situatioun vum Student a vu sengen Elteren of, wéi och vun de Frais d'inscription, déi de Student ze bezuelen huet. Dës Regelung bezitt sech awer nëmmen op d'éischt an zweet Zyklus.

Bei den drëten Zykle gëtt just d'finanziell a sozial Situatioun vum Student gekuckt, an net méi déi vu sengen Elteren. Duerch dës Mesure geet fir de Student, dee sech an engem drëten Zyklus befënnt, den Deel Bourse vun der Finanzhëllef erop a mindert domat de Risiko vun enger Iwwerverschëldung.

D'Finanzhëllef vum Stat soll net e Blankoscheck duerstellen. Et gëtt deemno vum Student eng gewëssen Assiduitéit an e gewëssene Seriö verlaangt. An dësem Sënn gëtt d'Dauer, während där e Student vun der Finanzhëllef profitéiere kann, begrenzt. D'Finanzhëllef gëtt limitéiert op d'Regelstudienzäit plus ee Joer, also ee Joer méi laang wéi déi Zäit, déi offiziell fir déi betreffend Studië virgesinn ass. An anere Wieder: Bei Studien, déi offiziell 4 Joer daueren, kann ee während 5 Joer vun der Finanzhëllef profitéieren, dat heescht, et kann ee sech een Echech erlaben.

Et geet hei drëm, fir ze verhënneren, datt Studenten an déi schwierereg Situatioun kommen, wou se no enger Rei vun Joren op der Uni ouni Diplom do stinn an awer an

där Zäit en zolitte Scholdebierg ugeheeft hunn. Et geet also weider drëm, fir de Fäll vun Iwwerverschëldung virzebeugen.

Déi Regel, déi ech elo grad beschriwwen hunn, ass awer net rigid, an de Projet de loi gesäit Ausnahmeregelunge vir. Folgend Fäll ginn zum Beispill berücksichtig:

- wann e Student Zousazstudië mécht;
- wann e Student wëll déi Studië fäerdeg maachen, déi en aus iergendengem Grond net ofgeschloss hat;
- wann e Student sech nom éischte Joer wëll nei orientéieren, oder
- wann de Student sech an enger schwierereg an aussergewöhnlecher Situatioun befënnt.

Iwwregens: D'Notioun vun den Zousazstudien, déi hei gebraucht get, ass nei. Et handelt sech dobäi ëm Studenten, déi en Diplom vum zweeten Zyklus hunn an nach en zousätzlechen zweeten Zyklus maache wëllen an engem Beräich, deem als complémentaire zu hirem éischten Diplom kann ugesi ginn.

Duerch de Projet de loi ginn d'Konditiounen awer net nëmme méi large. D'Finanzhëllef kann nämlech och refuséiert ginn, wann e Student Resultater opzeweisen huet, déi "gravement insuffisants" sinn. Bei esou enger Décisioun kann de Minister op déi consultativ Kommissioun zréckgräifen, déi am Projet de loi virgesinn ass.

Et ass och wichteg, datt d'Studenten encouragéiert ginn, fir hir Studien an der Regelstudienzäit ofzeschléissen. Et gouf an dësem Sënn bis elo déi sougenannte Bourse spéciale vu 40.000 Frang. Dës Bourse spéciale gouf ausbezuel, wann e Student den éischten Zyklus vu senger Studien innerhalb vun der Regelstudienzäit plus maximal 1 Joer ofgeschloss hat.

Dëse System - an dat ass interessant - gëtt elo generaliséiert. De Projet de loi schwätzt elo, mat Recht, vu Primes d'encouragement. Si sollen de Student motivéieren, seng Studien esou gutt an esou schnell wéi méiglech zu Enn ze bréngen. Ech wëll ënnersträichen, datt dës Primen nëmme vum Mérite ofhänken, dat heescht, datt weder d'finanziell Situatioun vum Student, nach déi vu sengen Elteren eng Roll spillt.

De generaliséierte System vun de Primë gesäit also folgendermoossen aus: D'Prime vu 40.000 Frang fir den Ofschloss vum éischten Zyklus bleift weiderhi bestoen a funktionéiert no de selwechte Kritäre wéi virdrun. Fir dës Prime ze kréien, muss een also säin éischten Zyklus an der Regelstudienzäit plus maximal ee Joer ofgeschloss hunn. Dës éischt Prime gëtt direkt ausbezuel.

Da ginn zwou weider Primen agefouert: Et gëtt eng Prime vun 80.000 Frang fir den Ofschloss vum zweeten Zyklus, an dann nach eng Prime vun 80.000 Frang nom Ofschloss vun engem drëten Zyklus. D'Primë fir den zweeten an drëten Zyklus ginn nëmmen dann ausbezuel, wann d'Regelstudienzäit respektéiert gëtt. Wann e

Student eng vun dësen zwou neie Primen oder déi zwou zegutt huet, gi se awer net onbedéngt direkt ausbezueelt.

Et muss een hei zwou Situatiounen ënnerscheeden. Am Fall, wou de Student e Prêt opgeholl huet, gëtt d'Prime op de Montant vun dësem Prêt zrëckbezueelt. Dës Mesure ass geduecht, fir géint d'Iwwerverschëldung virzegoen. Am anere Fall, also wann de Student kee Prêt opgeholl huet, gëtt d'Prime, wéi déi vum éischten Zyklus, direkt ausbezueelt.

Ech mengen kënnen ze soen, datt mir heimat e relativ generéis an awer pragmatische Mechanismus fonnt hätten.

Här President, Dir Dammen an Dir Hären, wéi ech schonn erkläert hunn, setzt sech d'Finanzhëllef vum Stat haaptsächlech aus Boursen a Prêten zesummen. Dës Prêten hunn hir Spezifisitéit. D'Modalitéite vun deene Prêten ënnerleie Konventiounen, déi tëschent dem Stat an de Banken ofgeschloss ginn. Am Kader vun dëse Konventiounen gëtt och festgeluegt, zu wéi engem Deel de Stat sech un den Zënse vun esou engem Prêt bedeelegt. De Student bezillt am Moment 2%, de Rescht iwwerhëlt de Stat. Dës Subventiounen vun den Zënse kréien duerch dëse Projet de loi eng méi zolitt legal Basis.

De Stat huet seng Hand awer och nach op eng aner Aart a Weis mat am Feier. En iwwerhëlt nämlech d'Garantie vun de Prêten. De Remboursement vun de Prêten erstreckt sech laut Règlement grand-ducal iwwer eng Period vu bis zu 10 Joer. Et kënnt awer ëmmer nees zu Schwieeregkeete beim Remboursement. Et gouf deemno no Méiglechkeete gesicht, déi et dem Stat erlaben, nieft dem Droit commun, a Fäll, wou et Problemer mam Remboursement gëtt a seng Garantie gespillt huet, un d'Suen ze kommen.

Et sinn dës net déi Fäll, wou e fréiere Student Schwieeregkeeten huet weinst plötzlechen Evénementen am Liewen, déi op en zoukomm sinn. Mä et sinn déi Situatiounen, wou e fréiere Student ganz bewusst sengen Obligatiounen net nokënnt. Et war net einfach, dësen delikate Problem ze léisen.

An enger éischer Etapp gouf dru geduecht, fir d'Garantie vun den Elteren ze froen; dës ass awer net tragbar an hätt de Student a senger fräier Entscheedungsméiglechkeet a Fro gestallt. De Projet de loi huet dunn zwou Mesurë virgesinn, wou awer, no enger Opposition formelle vum Statsrot, nëmmen eng zrëckbehalte gouf.

De Mechanismus, deen am Projet de loi steet, esou wéi en elo virläit, gesäit vir, datt de Student dem Stat seng Rechter cédiert op der Restitutioun vun der TVA, wat d'Wunnéngen ubelaangt. Dës Solutioun gouf vum Ministère vum Enseignement supérieur proposéiert, no Consultatiounen mat dem Budgetminister, dem Enregistrement an der ACEL, der Associatioun vun de Lëtzebuerger Studenteceren. De Statsrot an d'Chamberkommissioun hu sech deem ugeschloss.

Des Weidere gesäit de Projet de loi eng consultativ Kommissioun vir, déi dem Minister a verschiddene Fäll en Avis soll ginn. Et dréit sech hei virun allem ëm déi

Fäll, wou e Student an enger graver an exceptioneller Situatioun ass. Nom Avis vun dëser Kommissioun kënnen vum den zoustännegen Ministere folgend Décisiounen geholl ginn: De Montant vun der Finanzhëllef kann eropgesat ginn, et kënnen Délaie beim Remboursement accordéiert ginn, an e Student kann deelweis oder ganz vum Remboursement vum Prêt dispenséiert ginn. Do dernieft kann den zoustännegen Minister d'Kommissioun och nach mat Avien zu allen anere Froen beoptragen, déi him nützlich schéngen.

Här President, Dir Dammen an Dir Hären, ofschléissend wéilt ech soen, dass mir mat dësem Projet en Zeeche setzen. D'Studente sollen encouragéiert ginn, fir hiert Beschte ze ginn an uerdentlech Studien ze maachen. E Student muss och kënnen säi Wee sichen an de Studië vum sengem Choix nogoen. Dobäi mussen d'Studente kënnen op déi finanziell Hëllef zielen, déi hinnen zousteet.

Wat de Stat awer net acceptéiere kann, dat ass, datt öffentlech Gelder gebraucht ginn, fir e schéint Liewen ze féieren a Jonker mat Iwwerverschëldung an ouni Diplom ze fördern.

Dëse Projet de loi stellt also e gesonden Equiliber duer, en Equiliber tëschent engersäits enger generéisere finanzieller Ënnerstëtzung, op déi d'Studenten ziele kënnen, an anersäits der néideger Assiduitéit, déi vun hinne verlaangt gëtt.

Et ass virgesinn - an dat ass elo ganz wichteg, zum Schluss ze wëssen -, datt dës Gesetz den éischte Juli, no senger Publicatioun am Mémorial, a Kraaft triede soll. All d'Studenten, déi an deem Moment, wou d'Gesetz a Kraaft trëtt, op enger Uni oder op enger Héichschoul ageschriwwen sinn, kommen an de Genoss vun deenen neien Dispositiounen. Wa mir dëse Projet de loi also haut unhuelen, kann d'Gesetz schonn an engem Mount ugewannt ginn, an déi jëtze Studente kënnen nach an de Genoss vun deenen neien Dispositiounen kommen, besonnesch wat d'Primes d'encouragement ugeet.

Ech géif Iech also alleguer, léif Kolleeginnen a Kolleegen, wärmstens ëmfehlen, dësem Projet de loi zouzestëmmen, esou wéi mir dat och an der Kommissioun gemaach hunn.

Ech soen Iech merci.

M. le Président.- D'Wuert huet den Här Claude Wiseler.

Discussion générale

M. Claude Wiseler (CSV).- Här President, Dir Dammen an Dir Hären, d'Mme Stein huet virdrun alleguer de Leit merci gesot, déi matgeschafft hunn. Ech wëll awer och hir merci soen. Si huet e gudden a flotte Rapport gemaach, d'Diskussioun an der Kommissioun zügeg gefouert an e gudden Résumé an hirer Ried vun all deem gemaach, wat an der Kommissioun gesot ginn ass.

D'lescht Woch hu mer schonn zu engem Deel iwwert dës Sujet geschwat, wéi mer am Etat de la Nation eng instruktiv Diskussioun iwwert d'Héichschoulwiesen zu

Lëtzebuerg haten. Mir hunn do de Kader vun der Regierung ganz kloer nach eng Kéier opgezeechent kritt. Et soll zu Lëtzebuerg kee kompletten Universitätszyklus an alle Fächer ginn, wat de Virdeel vun enger gréisserer Internationalisatioun vun eise Studenten huet, déi esou Erfahrungen am Ausland kënnen sammelen.

Et ass natierlech och gesot ginn, dass eng ganz Rei Studenten hir Studien a Stied maache ginn, déi no ronderëm Lëtzebuerg leien, wat vläicht net déi ganz grouss Welt ass, ob dat elo Stroossbuerg ass, Nanzeg, Léck, Metz, Bréissel, Tréier oder wéi nach ëmmer se heeschen. Ech sinn awer der Iwwerzeugung, dass en anert Ëmfeld, haaptsächlech d'Integratioun an en anere System, an aner Gewunnechten, trotzdeem e Schrëtt bedeit, deen et wichteg ass, dass eis Studenten e maachen, dass se aus eisem Land erauskommen, e kleng Schrëtt vläicht nëmmen iwwert d'Grenzen ze maachen, fir do an aner Saachen eranzegesinn. Net all Student geet just op Tréier, mä mir hunn der och ganz vill, déi an aner Stied ginn. Ech denken, dass an Zukunft et ëmmer méi wäert esou sinn, dass gekuckt gëtt, dass verschidden Universitéite mat hire Programmer an déi Lëtzebuerger Universitéit mat hirem Zyklus, dee se presentéiert, an en Ensembl kënnen erassen.

Dofir mengen ech, dass dat schonn e positiven Aspekt huet, an dës Positioun erlaabt eis et natierlech, an eiser Héichschoulpolitik eis ze konzentréieren op den Ausbau vun drëtten Zyklen, op den Ausbau vun neien Initiativen, wou Initiativgeescht ka gewise ginn a mir esou eis Renommée kënnen ausbauen.

Et ass an deene leschte Jore vill an dësem Kontext gemaach ginn. Mir hunn eng Politik gemaach, fir de Postuniversitaire zu Lëtzebuerg auszubauen. Mir hunn e Fonds national de recherche an deene leschte Joren op d'Bee gesat, an d'Mme Hennicot-Schoepges huet virun e puer Deeg hiert Wäissbuch presentéiert, wou se den Développement vun dem Héichschoulwiesen zu Lëtzebuerg an de groussen Zich virstellt. Dëst schéngt mir eng wichteg Saach ze sinn, wann een d'Zukunft kuckt.

Et ass eng Politik also, wou d'Studente mat auslänneschen Unien a Kontakt sollen a mussen kommen, eng Politik och, wou de Postuniversitaire an d'Recherche grouss geschriwwen ginn. Dës Politik natierlech, wann ee se esou konzentréiert, se esou résuméiert, verlaangt och e Bourségesetz, e finanziellen Ënnerstëtzungssystem, deen ugepasst ass, ugepasst selbstverständlech un de Fait, dass en Auslandsstudie finanziell muss erlaben an och d'Recherche an de Postuniversitaire zu Lëtzebuerg méi ënnerstëtzt mussen ginn.

A wann een elo kuckt, wat dat Gesetz, wat mer amgaange sinn ze diskutéieren, effektiv bedeit, da muss ech soen, dass schon Haaptpunkten dervun op déi Politik opgebaut sinn an déi Politik, déi ech virdru beschriwwen hunn, och ënnerstëtzen.

Et erlaabt Auslandsstudien. 1998 huet de Familljeministère d'Rheinisch-Westfälisches Institut fir Wirtschaftsforschung beoptraagt, eng Etüd ze maachen iwwert d'sozial Transfere zu Lëtzebuerg. Et war eng

interessant Etüd - si ass och an der Chamberkommissioun diskutéiert ginn -, an deem Sënn, dass se probéiert huet - wat net einfach ass -, fir eise ganze Sozialsystem, ob dat elo d'Steiere sinn, d'Kannergeld ass, d'Familljentransfere am allgemengen, d'Wunnéngsbäihëllefen, d'Studenteboursen, d'sozial Tariffer an de Foyers de jour, an de Crèche, emol eng Kéier an enger Gemeinsamkeet ze analyséieren an ze kucken, wéi eise Sozialsystem géing aneneeggräifen. Do si ganz kloer, och wat de Boursésystem ugeet, Konklusiounen erauskomm.

De Rapport seet: "Die Studienförderung basiert auf einem zinsvergünstigten Darlehen und nicht rückzahlbaren Transfers, die Studienbörsen. Beide Komponenten stellen zusammen mit dem Kindergeld sicher, dass ein Studium nicht an der Frage der Finanzierung scheitert." Dat ass fir mech eng relativ wichteg Ausso. Scho mat deem alen Text war séchergestallt, dass Studenten, déi am Ausland wollte studéieren, och konnten am Ausland studéieren, dass jiddefalls net aus finanzielle Grënn esou e Studium a Fro gestallt ginn ass.

Mat dësem Text verbessere mer déi Situatioun a setzen dës finanziell Ofsécherung nach op en Niveau méi héich. Gëschter krute mer d'Zuele vum Budgetministère, wat den zousätzleche Käschtepunkt vun dësem Text wär. An dee Käschtepunkt - e léisst sech weisen - läit an Zuele bei 138,3 Milliounen Zousatzkäschte järelech; dat si 94,8 Milliounen fir déi verschidden Type vu Primes d'encouragement, 20 Milliounen fir d'Boursen, déi geduecht si fir d'Prise en charge vun de Frais d'inscription, an nach eng Kéier 23,5 Milliounen fir Boursé vum drëtten Cycle; also e substanziellen Zousazeffort, dee gemaach gëtt an och an dee Kontext vun der Héichschoulpolitik passt, dee mer amgaange sinn ze entwéckelen.

Och maache mir eng Politik vum Ausbau vun der Recherche an dem drëtten Zyklus. Do sinn déi Zuelen, déi genannt sinn, och relativ kloer. De Budgetministère seet, dass mer d'Boursé fir den drëtten Zyklus ëm 23,5 Milliounen wäerten hiewen, dass d'Primes d'encouragement fir den drëtten Zyklus 20 Milliounen ausmaachen, dat heescht en zousätzlechen Total vun 43,5 Milliounen järelech fir den drëtten Zyklus. Dat ass natierlech nëmmen eng Estimatioun. Ech ka mer denken, dass, wann déi Politik gräift, dat och nach wäert an d'Luucht goen; also en zousätzlechen substanziellen Effort, dee mir an dësem Sënn maachen.

Dozou wëll ech soen, dass mer haut schonn eng Gesetzgebung hunn, déi op engem anere Plang d'Recherche ënnerstëtzt, andeem se Boursé gëtt fir spezifesch Recherche, fir interessant Projeten zu Lëtzebuerg.

Ech wëll just eng Klammer opmaachen a soen, dass et wichteg ass - mä dat kann een net an dësem Gesetzestext maachen -, dass ee sécherstellt, dass Boursen, déi elo fir den drëtten Zyklus iwwert dësen Text kommen, net duerno eng Verkierzung vun anere Boursen, déi iwwert d'Recherche géinge kommen, bréngen, well do Cumulbestëmmungen dra wäeren. Et muss kloer sinn, dass dës Boursé fir den drëtten Zyklus an déi aner Rechercheboursen eng spezifesch Finalitéit hunn an och spezifesch müssen independent eng vun där anerer behandelt ginn.

Zousätzlech zu dëse Remarque wëll ech kuerz soen, dass ech déi Prinzipien, déi dësem Gesetzesprojet zu Grond leien, selbstverständlech als richtig ëmfannen; de Wëllen, fir eis Definitiou vum den Héichschoulstudien esou unzepassen, dass se ugepasst ass un dat, wat an Europa um legale Plang an deenen nächste Méint a Jore wäert geschéien, dass se ausdrécklech eng Ënnerstëtzung vum der Seriositéit vum de Studiëgäng gëtt duerch déi Primes d'encouragement, Délaie fir den Ofschloss asetzt, déi agehale solle ginn, a parallel Moosname géint d'Iw-werverscheldung virgesäit, déi de Start an d'profession- nellt Liewen oft kënnen erschwéieren, duerch de Fait, dass d'Prête mussen zréckbezuelen ginn.

Och gëtt de Stat sech, an ech menge berechtigterweis, eng juristesche Basis, fir bei deene Studenten, déi wëllentlech schlecht oder net zréckbezuelen, kënnen anzegräifen, andeem de Student dem Stat seng Rechter cédiert op d'Restitutiou vum der TVA, wat d'Wunnéngen ubelaangt.

Als Konklusioun wëll ech soen, dass selbstverständlech d'CSV-Fraktioun dëse Projet wäert stëmmen, e Projet, deen den Zilsetzung gerech gëtt an an de Kader vum enger ambitiöser Héichschoul- a Recherchepolitik erapasst.

Ech soen der Rapportrice nach eng Kéier merci, an Iech fir d'Nolauschteren.

M. le Président.- Den Här Ben Fayot huet d'Wuert.

M. Ben Fayot (LSAP).- Här President, Dir Dammen an Dir Hären, mat dësem Gesetz adaptéiere mer e Gesetz vum 8. Dezember 1977, also e Gesetz, wat 23 Joer al ass. Dat ass de Beweis, dass dat Gesetz vum 1977 e gutt Gesetz war an eiser schnelllebiger Zäit. Ech erënneren drun, reng aus historeschem Interessen, dass dat Gesetz ënnert enger sozial-liberaler Koalitioun gemaach ginn ass.

(Interruption)

Ech kommen dorop, Här Hoffmann.

De Rapporteur war den honorable Jean Regenwetter, un deen Dir Iech bestëmmt kënnt erënneren, an den Auteur vum Gesetz war den deemolege Statssekretär Guy Linster.

Dëst Gesetz ass iwwregens de 15. November 1977 an dëser Chamber gestëmmt ginn, mat 30 Stëmme géint 28. Deemools huet ënner anerem d'CSV dergéint gestëmmt, an och aner Oppositiousgruppen. Eng vun deenen Oppositiousgruppen huet deemools gesot - an dat ass en Zitat, dat ech wierklech hei bréngen muss; et staamt vum der heiteger CSV-Politikerin an deemoleger SDP-Politikerin, der Mme Lulling, déi gesot huet -: "Ech muss soen, dee reaktionärsten Unterrichtsminister géng sécher bleech ginn, wann en deen diabolisch ausgeklügelte System hei géng gesinn, deen zu esou Auswierkunge féiert, déi awer och guer net den Numm sozial verdéngen."

Et ass heiansdo interessant, fir esou e Gesetz, wat mer modifiéieren, e bëssen an déi historesch Dimensioun ze setzen, an et huet sech och gewisen, dass trotz allen Unkenrufen deemools dat Gesetz awer eng Partie gutt Auswierkungen hat, well, Här Hoffmann, dat muss ech soen: Dee System, dee mir virun 1977 haten, war awer a muncher Hisiicht relativ minimalistesch. En huet aus Subsidies remboursables bestanen, an och aus eenzelne Boursen. Déi Subsidies remboursables hu laang net derzou gefouert, dass e wesentlechen Objektiv vum der Enseignementspolitik, nämlech d'Demokratisatioun vum den Etüden, konnt duerchgefouert ginn.

M. André Hoffmann (déi Lénk).- Si sinn oft a Boursen herno ëmgewandelt ginn.

M. Ben Fayot (LSAP).- Jo, si sinn oft a Boursen ëmgewandelt ginn, mä si hunn awer, an dat huet och den deemolege Rapporteur, den honorablen Här Regenwetter kloer gesot, net derzou gefouert, dass vill Aarbechterkanner konnten op d'Uni goen, an dofir war et och wichtig, en neie System ze fannen.

Dee System gëtt an dësem Gesetz zum gréissten Deel bäibehalen. E gëtt affinéiert, an et kommen eng Partie technesch Adaptatiounen, déi eis Mme Rapporteur op eng excellent Manéier an exhaustiv duergestallt huet. Ech brauch also net méi am Detail dorop zréckzekommen. Ech wëll just zu eenzelne Problemer eppes soen.

En éischte Problem, deen ech perséinlech bei deem Text nach ëmmer hunn, dee mer an der Kommissioun gestëmmt hunn, ass dee vun der Garantie, déi de Stat sech hält, fir de Remboursement vum de Prêts remboursables ze assuréieren.

De Stat huet sech jo en Hiewel ausgeduecht, nämlech d'Recht, fir d'Restitutiou vum der TVA bei dem Bau oder der Transformatioun vum engem Logement ze verlaangen. Ech si perséinlech der Meenung, dass et richtig ass, dass de Stat probéiert, Garantien ze hunn, fir Suen erënzekréien, déi e virstreckt, mä ech hu meng Zweifelen, ob dat do wäert funktionéieren, eleng nëmmen aus der Optik vum dem Secret informatique.

Mir brauche jo dofir e relativ groussen Opwand, well mer brauchen emol e Fichier vum all deenen, déi Prêts remboursables kréien, an dat sinn der jo vill, iwwer 4.000 Studenten. Mir brauchen och e Fichier beim Enregistrement, wou déi TVA erëmbezuel gëtt. Mir müssen déi zwee Fichiere matee verbannen, fir erauszefannen, wien net bezuelen huet a wat mer mat deem Mëttel kënnen huelen. Ech si perséinlech der Meenung, dass dat e Problem ass fir de Secret informatique. Dat ass eng Reserve, déi ech zu deem Projet hunn, wéi en elo virläit. Ech hunn dat och an der Kommissioun ugemellt.

Eng wichteg Innovatioun, keng reng technesch Innovatioun, mä eng wichteg politesch Innovatioun an deem Projet, ass natierlech d'Ausdehnung vum der Finanzhëllef op d'Studië vum drëtten Cycle.

Dat bedeit, datt mer och deen drëtten Cycle wëllen encouragéieren. Dat heescht, dass mer d'Studente wëllen encouragéieren, méi laang studéieren ze goen, och even-

tuell Recherche ze maachen, an dobäi natierlech dee wichtege Punkt, dass de Student vum drëtte Cycle eleng gekuckt gëtt. Während mer fir den éischten an den zweete Cycle de Student kucken am Zesummenhank mat der sozialer a finanzieller Situatioun vu senger Famill, kucke mer beim drëtte Cycle de Student eleng, ouni Relatioun mat der sozialer Situatioun vu senger Famill.

Ech muss soen: Dat ass menger Ansicht no eréischt eng Etapp, well 1977, wann een déi Debatte vun deemools kuckt, ass gesot ginn, dass et ëmmer méi dozou kënnt, dass jonk Leit vun 18, 20, 21 Joer, déi Studië maachen, sech och wëllen onofhängeg am Liewe situéieren, dass ee muss dozou kommen, fir de Student onofhängeg vun der Familljesituatioun ze kucken. Et ass jo och méiglech, dass zum Beispill e Student mat senger Famill net eens gëtt, dass d'Famill net d'accord ass, fir him d'Studien ze finanzéieren, a wann deen da seng Studien awer wëllt maachen, dann huet en no eisem Gesetz keng Méiglechkeet, fir dat duerchezéien, ausser Primes d'encouragement.

D'Mme Minister seet, dat wier net de Fall. Ech wier frou, wa se eis dat géif am Detail erklären, mä esou, wéi ech den Text liese vum Gesetz, ass et d'Situatioun vum Student an d'Situatioun vu senger Famill, déi ausschlaggebend sinn, plus selbstverständlech d'Frais d'inscription op der Uni, fir d'Héicht vu senger Finanzhëllef ze déterminéieren.

Ech mengen also, dass mer nach méi resolut müssen op de Wee goen, fir och de Student a senger eegener Situatioun, onofhängeg vun der sozialer Situatioun vu senger Famill, ze kucken. Dat ass, mengen ech, an der Evolutioun vun der Gesellschaft.

Ech hunn och an deem Zesummenhank eng Kritik, déi ech schonn ugemellt hunn. Aner Kollege vu menger Fraktioun hunn dat och scho gemaach. Dat ass, dass bis 1999 Adulten, déi am Aarbechtsprozess waren, konnten op Grond vum Gesetz vun 1977 Finanzhëllef kréien. Säit 1999 ass dat net méi de Fall, well, sou huet d'Mme Minister an enger Äntwert op eng Fro vum Här Jeannot Krecké gesot, dat net an der Logik vum Gesetz vun 1977 wär.

Ech zitieren déi Äntwert vun der Mme Minister op déi Fro vum Här Jeannot Krecké, wou se seet, a Bezuch op d'Gesetz vun 1977, "que le nouveau système d'aides financières pour étudiants, tout en maintenant un caractère social en faisant intervenir le revenu des parents et de l'étudiant, vise une meilleure répartition des charges à assurer par les étudiants". Do zitiert se also d'Viraarbechte vum Gesetz vun 1977, a si zitt dann d'Konklusioun: "Il ressort de ces conclusions que le législateur a eu à coeur d'élaborer une loi destinée à venir en aide aux étudiants financièrement dépendants de leurs parents", wat dann onméiglech géif maachen, dass zum Beispill Adulten, déi Unisstudien weidermaachen, déi iwwer Fernuniversitéiten oder aner Méiglechkeeten, fir à temps partiel Unisstudien ze maachen, géifen dorënner falen.

Etant donné déi Situatioun hunn ech geduecht, et wier net schlecht, wa mer géifen als Chamber eng Motioun

stëmmen, fir ebe just dee Problem un d'Regierung erunzedroen. An där Motioun, wou ech dat op franséisch exposéieren, wat ech elo just op lëtzebuergesch gesot hunn, gëtt dann och d'Regierung gefrot, fir Finanzhëllef fir Adulte virzegesinn, déi Unisstudien oder Etudes supérieures maachen "dans le cadre de l'apprentissage tout au long de la vie". Dat ass jo eng Notioun, déi jiddereen am Mond huet, an dann och, fir déi Méiglechkeeten ze notzen, déi mer am neie Gesetz iwwert d'Finanzhëllef fir d'Studenten hunn. Dat ass eng Motioun, déi ech heimat wëll erarechen.

Motion 1

La Chambre des Députés

- *considérant le projet de loi concernant l'aide financière de l'Etat pour études supérieures;*

- *considérant le nombre en augmentation constante de personnes adultes insérées dans le monde du travail qui décident de reprendre ou de poursuivre des études supérieures à temps partiel ou à distance;*

- *considérant que jusqu'en 1999 des prêts avec ou sans charge d'intérêts étaient alloués à ces adultes en fonction de leurs revenus;*

- *considérant que cette année ces demandeurs se sont vu refuser toute allocation d'aide financière sous prétexte que leur cas n'est pas prévu dans la loi du 8 décembre 1977 concernant l'aide de l'Etat pour études supérieures;*

- *considérant que Madame la Ministre, dans la réponse à la question parlementaire 276 de Monsieur le Député Jeannot Krecké "convient que, dans le contexte de l'apprentissage tout au long de la vie, il est nécessaire d'envisager des dispositions connexes qui permettraient d'élargir le champ d'application de l'aide financière;*

invite le Gouvernement

- *à prévoir des aides financières pour les adultes qui poursuivent des études supérieures dans le cadre de l'apprentissage tout au long de la vie;*

- *à utiliser toutes les possibilités de la nouvelle loi sur l'aide financière de l'Etat pour études supérieures pour venir en aide aux adultes en question.*

(s.) Ben Fayot, Mars Di Bartolomeo, Jeannot Krecké, Jos Scheuer, Marc Zanussi.

Schliesslech wëll ech nach soen, dass nieft deene méi techneschen Adaptatiounen an deem Gesetz selbstverständlech och e politeschen Objektiv ass. Dee politeschen Objektiv ass éischstens emol deesewechte wéi 1977, fir d'sozio-kulturell Chancëgläichheet vun de Kanner ze assuréieren, dat heescht, och d'Zuel vu Kanner aus deene Milieuen, déi sech vläicht Unisstudien net esou gutt kënne leeschten, eropzedreien.

Den zweete politeschen Objektiv ass ganz kloer deen - an dat ass och am Exposé des motifs ugeschnidden -, fir

d'Zuel vun den Unisstudenten zu Lëtzebuerg iwwerhaapt eropgedreiwten.

Et gëtt gesot, et wiere 4.200 Studenten, déi vun den Aides financières elo géife profitéieren, a mir hätten insgesamt, ouni dass mer dat genee kënnen novollzéien, 7.000 Studenten, déi aus Lëtzebuerg op Unie ginn, ze vermellen.

1977 waren et nach 2.171 Studenten insgesamt. Ech weess net, ob déi Zuele stëmmen. Et ass ëmmer ganz schwéier, well mer keen zentrale Regëster hunn, wou déi Studenten alleguer enregistriert sinn.

D'Mme Hennicot huet an hirem Wäissbuch iwwert den Enseignement supérieur ganz kloer gesot, dass dat eng ongenügend Zuel vu Studenten ass. Déi Konstatatioun gëtt och an allen internationale Statistiken corroboriert.

Fir ofzeschléissen, Här President: Mer kënnen eis net nëmmen als politeschen Objektiv ginn, d'Zuel vun de Studenten, déi an d'Ausland ginn, méi héich ze dreiwten, duerch e System vu Finanzhëllef. Ech mengen, dass de System vun Aides financières, sou wéi mer dat och beim Gesetz vun 1987 iwwert d'Recherche gemaach hunn, muss agebett ginn an eng Universitätspolitik, an eng Héichschoulpolitik zu Lëtzebuerg, an ech gesinn dat am Zesammenhank mam Gesetz vun 1987. Mam Gesetz vun 1996 ass dat Gesetz hei vum Joer 2000 fir mech en Element, dat sech doranner muss aglidderen.

Ech sinn och der Meenung, dass mer an deenen nächste Joren nach mussen e Schrëtt weidergoe wéi just e Gesetz vu Finanzhëllef, wat Leit, déi an d'Ausland studéieren ginn, ënnerstëtzt. Ech mengen schonn, dass mer d'Héichschoulpolitik zu Lëtzebuerg mussen entwéckelen.

Ech soen Iech merci.

M. le Président.- Als nächste Riedner ass den Här Xavier Bettel agedroen. Den Här Bettel huet d'Wuert.

M. Xavier Bettel (DP).- Här President, Dir Dammen an Dir Hären, ech wollt fir d'Éischt der Mme Nelly Stein merci soen, als Présidente-rapportrice, fir de komplette Rapport, dee se eis presentéiert huet. D'Gesetz an de Règlement grand-ducal, déi mer an der Kommissioun haten, hunn nämlech fir vill interessant a laang Debatte gesuergt.

Wien hautdësdaags um Aarbechtsmaart Fouss faasse wëllt, muss op eng zolidd Formatioun zréckgräife kënnen, eng Formatioun, déi de spezifeschen Ufuerderungen a Besoine vum Aarbechtsmaart gerecht muss sinn, en Aarbechtsmaart, deem ëmmer méi exigent a spezialiséiert gëtt, mat Patronen, déi ëmmer méi héichqualifizéiert Personal sichen.

Hei zu Lëtzebuerg awer geet nëmmen 1,63% vun der Gesamtbevölkerung op eng Universitéit oder Héichschoul. An den Entreprises sinn d'Kaderpositiounen gréisstendeels vun auslänneschen Leit besat. Dat heescht, mir leien am Verglach mat aneren europäesche Länner mat

eisen ongeféier 7.000 Studenten manifestement ënnert der Moyenne.

Gläichzäiteg schwätze mer vun enger dynamescher Wirtschaft, fir datt och an Zukunft de Standuert Lëtzebuerg näischt u senger Attraktivitéit verléiere soll. Wann dat eis Ambitioun sinn - an ech denken, dat si se -, da läit et jo op der Hand, datt de Stat an en intellektuellt Kapital, dee wierkleche Räichtum vun eisem Land, muss investéieren, fir datt dës Ambitiounen an d'Praxis ëmgesat kënnen ginn.

Mir brauche qualifizéiert, spezialiséiert a motivéiert jonk Leit. D'Aufgab vun eisem Stat ass et, dës jonke Leit déi beschtméiglech Formatioun éischters ze bidden an zweetens ze erméiglechen. An anere Wieder: De Stat huet d'Obligatioun, déi finanziell Hëllef ze stellen, fir datt eis Jugend esou einfach wéi méiglech en universitären Studium ugoe kann.

Ech sinn dofir besonnesch frou, fir am Numm vun der Demokratescher Partei e puer Wuert zum Gesetzprojekt iwwert déi staatlech finanziell Hëllef fir Etudes supérieures ze soen, e Gesetzprojekt, deem eis als Demokratesch Partei eminent wichteg erschéngt. Eis Leit vun der DP-Fraktioun hunn dofir keen Asaz a keng Méi geschéit, fir dës Projet esou matzestalten, datt hien deene Problemer Rechnung dréit, déi dat aalt Gesetz vun 1977 a seng Modifikatiounen vun 1992 net léise konnten.

Dës Gesetzprojekt ass endlech adaptéiert un d'Situatioun um Terrain a respektéiert de Fait, datt déi meeschte Studenten en auslänneschen Diplom hunn. Et war dofir noutwendeg, eis lëtzebuergesch Législatioun un d'Kritäre vun den auslänneschen Héichschoulstudien unzepassen. Mat dësem Gesetzprojekt sinn och elo déi Studenten considéiert, déi sech entweder fir e Studium vun zwee Joer oder awer fir méi e praktesch orientéierten Zyklus wéi e Studium à cycle court entscheeden hunn.

Här President, Dir Dammen an Dir Hären, d'Zil vun dësem Gesetzesvorschlag ass, all Student dann ze ënnerstëtzen, wann hien et brauch. D'Zil vun dësem Gesetzesvorschlag ass net, déi Studenten, déi net wëssen, wat se solle léieren, oder einfach aus prakteschen Grënn emol e puer Joer op der Uni verbréngen, ze bestrofen, mä au contraire se ze responsabiliséieren.

Déi eemoleg Prime d'encouragement no der Réussite vum éischten Zyklus soll dofir och eemoleg bleiwen, fir den Tourisme étudiantin ze verhënneren.

De Student huet duerchaus d'Méiglechkeet, sech a verschiddene Studiumsbranchen ze versichen, mä seng Prime d'encouragement steet him awer nëmmen eng Kéier zou.

Et ass natierlech, wéi de Statsrot och richtig bemierkt huet, net ëmmer einfach, fir en Aussestehenden ze trancheieren, firwat e Student sech réorientéiert. Mä iergendwou muss et eng Grenz ginn, an ech sinn iwwerzeugt, datt déi responsabel Leit an der Regierung vu Fall zu Fall déi richtig Entscheedung treffen wäerten.

Schliesslech dierfe mer och net vergiessen, dass nie-went der Prime d'encouragement och nach meeschtens e Studenteprêt leeft, e Prêt, dee spéiderhi sech accumuliert a schwéier a laang zrëckbezuelt muss ginn, well oft deen néidegen Diplom an déi néideg Aarbechtsplaz fehlen.

Mir freeën eis, dass eisen Amendement iwwert d'Subvention d'intérêt zrëckbehalde ginn ass. De Stat dréit nämlech eng Partie vum Taux d'intérêt mat, fir dass de Student de Prêt zu engem méi gönschtegen Taux kritt. Ech widderhuelen awer, wéi wichteg et ass, d'Studenten am Viraus ze informéieren, wat de Prêt iwwerhaapt kascht. Ech hoffen, dass d'Ministesch esou séier wéi méiglech eng Informatiounsbroshür wäert preparéieren, fir de Studenten déi Infoe kënnen ze ginn.

De Stat awer huet mat deene jeeweilege Banken en Accord getraff, dee seet, dass hien d'Garantie vun de Prêten iwwerhëlt, wann déi betrafte Leit an der Onméiglechkeet sinn, hir Schold zrëckzebezuelen. Wat dat fir Konsequenzen huet, beleen Zomme wéi 40 Milliounen, déi de Stat zum Beispill 1997 huet missen un d'Banke bezuelen, an 20 Milliounen stinn haut nach op. Ech mengen, dat si jo keng Peanuts.

Deen neie Gesetzprojet wäert dës staatlech Garantie zwar net revidéieren, mä e gesäit awer verschidde Modalitéite vir, déi am Fall vu Remboursementsproblemer a Kraaft triede wäerten. De Stat iwwerhëlt déi kontraktéiert Schold zum Beispill, wann de respektive Student verscheed oder Chômeur ass, oder wann e sech an d'Ausland ofgesat huet, ouni eng Adress hei zu Lëtzebuerg ze hannerloossen.

Déi Leit, déi an der Onméiglechkeet sinn, hir Schold ze iwwerhuelen, well d'Liewen hinnen einfach schlecht gewollt huet, sollen trotzdeem net duerch e Studenteprêt nach zousätzlech bestrooft ginn. Et ass dofir virgesinn, entweder de Remboursementsdélai ze verlängeren oder de Remboursement zum Deel oder ganz ze iwwerhuelen. Am leschte Fall ass et natierlech nees um Stat, fir anze-gräifen an d'Schold ze iwwerhuelen.

Schliesslech besteet nach eng aner, wann och vläicht net grad déi beschte Méiglechkeet. Am Fall, wou den eemolege Student sech entscheed, en Haus ze bauen, obwuel hie säi Studenteprêt net zrëckbezuelt huet, soll d'Restitutioon vun der TVA, déi em jo eigentlech zousteet, an d'Hänn vum Stat falen. Et muss ee sech natierlech d'Fro stellen, ob vill jonk Diploméierter esou séier no hirem Studium à même sinn, fir sech en Haus vu kleng gerechent awer 10 Milliounen ze bauen, wa se hire Studenteprêt emol net zrëckbezuelt hunn.

(Interruption)

Op eng aner Manéier soll dëse Gesetzesprojet och virbeugend fir Abüer sinn. Déi Leit, déi an dësen Dossiere mussen tranchéieren, hu mat Sécherheet keng einfach Aufgab.

Här President, Dir Dammen an Dir Hären, trotzdeem, dëse Gesetzesvorschlag soll de Studenten déi néideg finanziell Hëllef stellen an déi belounen, ënner anerem

mat der Prime d'encouragement, déi et verdéngen. Well och wann d'Eltere sech, wéi ee sou schéi seet, gutt stinn, heescht dat nach laang net, dass d'Kanner an därselwechter finanzieller Situatioun sinn. Ech fannen et dofir eminent wichteg, dass per Gesetz festgehalde gëtt, net nëmme d'finanziell Situatioun vun den Elteren zrëckzebehalde fir déi aus dem drëtten Zyklus, mä och a virun allem déi vun de Studenten. Et wier dofir net vu Muttwëll, de Statut vum Étudiant indépendant anzeféieren, well et och Studenten aus dem éischten an zweeten Zyklus gëtt, déi net déi finanziell Ënnerstëtzung kréien, déi ee sech erwaarde kéint.

Déi jonk Leit, déi sech duerch hir Leeschtung besonnesch ervirdinn an dofir en drëtten Zyklus uginn, sollen och besonnesch ënnerstëtzt ginn. Leeschtung soll sech och hei lounen! A wéi gesot, mir hunn e Mangel u Leit an de Chefetagen. Et versteet sech dofir vu sech, dass grad déi Studenten, déi bewisen hunn, dass si capabel sinn, och deementspriedend ënnerstëtzt ginn. Dëse Gesetzesvorschlag gesäit dofir vir, d'finanziell staatlech Hëllef op den drëtten Zyklus ze erweideren, dat ëmsou méi, well wat e Studium méi laang dauert, wat en och mat méi héijen Onkäschte verbonden ass.

An ech mengen, d'allgemeng Schold vun eise Studenten ass jo beileiwen héich genuch. D'Majoritéit vun de Studenten huet ëmmerhin um Enn vun hire Studien eng Schold vu minimum 800.000 Frang ofzebezuelen. Ee vun deene wichtigste Punkten an dësem Projet ass, dass och Studente vun engem drëtten Zyklus vun deene selwechte finanziellen Hëllef profitéiere kënnen wéi déi Studenten aus dem éischten an zweeten Zyklus.

Iwwert d'Prime d'encouragement wollt ech just nach eng Confirmatioun vun der Mme Minister kréien, obwuel d'Mme Stein schonn driwwer geschwat huet. Am Artikel 12, Paragraph 1 an 2 steet: "La présente loi entre en vigueur le 1er juillet. Les étudiants inscrits à un cycle d'études supérieures au moment de l'entrée en vigueur de la loi, bénéficient des dispositions de la loi." Do wollt ech iwwert d'Interpretatioun vum Artikel 12 vum Gesetz vun der Ministesch ang Äntwert kréien op d'Fro, ob e Student, deen am Mee oder am Juni säin Zyklus scho gepackt huet, nach ëmmer d'Qualitéit vum Etudiant inscrit behält.

(Interruptions)

M. Mars Di Bartolomeo (LSAP).- Et freet ee sech, aus wéi enger Partei dass Dir kommt.

M. Jean-Paul Rippinger (DP).- Oh, Här Di Bartolomeo, denkt emol fir d'éischt un Iech!

(Hilarité)

M. Mars Di Bartolomeo (LSAP).- Ech denke ganz oft u mech, Här Rippinger. Ech denken net oft un Iech. Ech kann Iech berouegen.

M. Jean-Paul Rippinger (DP).- Dat gleewen ech och. Ech hunn dat och vill léiwer.

(Interruptions diverses)

M. Xavier Bettel (DP).- Soll ech dann elo nees ufänken?

Plusieurs voix.- Ah!

(Hilarité)

M. Xavier Bettel (DP).- Et ka jo net sinn, datt e Student, deen elo seng Exame gepackt huet, net vun der Prime d'encouragement kéint profitéieren, an awer een, deen eng zweet Sess elo kritt a se am September, Oktober schreift, vun där Prime profitéieren dierft, well en nom 1. Juli nach d'Qualitéit vum Student huet.

M. Jean Asselborn (LSAP).- Pacta sunt servanda!

M. Xavier Bettel (DP).- Här President, Dir Dammen an Dir Hären, dësen Text ass och zäitgeméiss, well e sech der Realitéit vun eiser Gesellschaft an, méi spezifesch, där vun de Famille monoparentale bewosst ass.

Déi zolidd juristesche Basis, déi mir an dësem Gesetzesprojet erëmfannen, soll an Zukunft hëllefen, fir et eise Studente sou einfach wéi méiglech ze maachen, e Studium ze féieren. Mä eng festgehalene juristesche Basis soll awer och verhënneren, datt et zu onnéidegen Abüen kënnt.

Et muss een och vläicht kucken, ob et mat der Zuel vun de Beamten an deem Service an Zukunft duergeet, well et ass jo e ganz neie Volume de travail, deen op si duerkënnt.

Et ass eiser Regierung wichteg, déi jonk Leit ze motivéieren, an un de Sue soll et net leien.

Une voix.- Ah!

M. Xavier Bettel (DP).- Educatioun a Formatioun si wierklech déi Beräicher, wou d'Regierung net spueren däerf, well et muss an d'Zukunft vun eisem Land investéiert ginn.

Ech soen Iech merci.

M. Mars Di Bartolomeo (LSAP).- Dir sot schonn, wéi eng vun Äre berühmte Virgängerinnen: "Den Avenir läit an der Zukunft!"

(Hilarité)

M. le Président.- Als nächste Riedner ass den Här Jacques-Yves Henckes agedroen. Den Här Henckes huet d'Wuert.

M. Jean-Paul Rippinger (DP).- Ären Avenir loung an der Vergaangenheet!

(Hilarité)

M. Mars Di Bartolomeo (LSAP).- An Är Vergaangenheet steet Iech ganz schnell bevir!

Plusieurs voix.- Oh, oh!

(Hilarité)

M. Jacques-Yves Henckes (ADR).- Wann ech d'Wuert däerf ergräifen an deenen eminent interessanten Debatten tëschent deenen zwou Fraktiounen LSAP an DP, da wéilt ech soen,...

(Interruptions)

...datt ech fir d'éischt wëll d'Mme Presidentin a Rapporteur vum Projet félicitéieren...

(Interruptions)

...fir hire kloere schrëftlechen a mëndleche Bericht. Mme Rapporteur, mir wëssen, dass dësse Projet Iech um Häerz läit. Mer stellen als ADR fest, dass d'Generalisatioun vun der Prime d'encouragement e signifikative Leeschtungsuräiz bitt. Mir begreifen och, datt dee Leeschtungsuräiz op den drëtten Zyklus étendéiert ginn ass an domat positiv Akzenter mam Gesetz gesat ginn.

Mä et muss een och festhalen, datt d'Zuel vun den Universitätsstudenten, déi mer hunn, déi niddregst an Europa ass. Dat muss eis ze denke ginn. Et huet hoffentlech zu engem Deel domat ze dinn, datt finanziell Grënn dofir ausschlaggebend sinn. Et wier also och nozekucken, ob et net nach aner Grënn gëtt, firwat vill jonk Leit deen Uräiz, fir op d'Universitéit ze goen, net fannen. Ech erwaarde mer, Mme Minister, datt d'Regierung higeet an do eng Analys mécht, firwat mer sou en niddrege Prozentsaz un Universitären hunn. Da kucke mer, fir iwwert eng gezielten Aktioun dee Prozentsaz ze héijen.

Et muss ee soen, dass souguer mat dësem Gesetz verschidde finanziell Hëllefen awer nach an eisem Land fehlen, datt munch Leit, déi hir Kanner wëllen op d'Universitéit schécken, Schwieeregkeeten hunn an hésitéieren, fir déi grouss Dépense ze maachen. Well och mat deene Subsidien, déi mer elo héijen, ginn awer eng etlech Fräen net gedeckt.

Mir musse feststellen, dass déi Leit mat méi klengem Revenu elo iwwert de Wee vu Subside gehollef kréien, mä datt alleguer déi Leit mat mëttlerem Akommes keng Hëllefe vum Stat kréien. Et muss een zum Beispill festhalen, datt Leit, déi e mëttlere Revenu hunn a kee Subsid kënne kréien, och net déi Dépensen, wat de Logement, d'Minerval, den Droit d'inscription ugeet, déi sech bei verschiddenen Héichschoulen heiansdo op 500.000, 600.000 Frang belafen, kënne vun de Steieren ofsetzen.

Dat ass e Manktum, an dofir erlaben ech mer, och eng Motioun an deem Sënn eranzebréngen, fir datt déi Fräen an Zukunft kënnen ofgesat ginn.

Augenblécklech ass et zwar méiglech, fir déi Leit, déi hir Kanner net méi an hirem Ménage hunn, fir e Montant vun 139.200 Frang als Abatement pour Charges extraordinaires ugerechent ze kréien. Dat bedéngt awer, datt se deen Ablack d'Steierklass vun 3.1, oder 2 oder 3 - wéivill Kanner et dann ebe sinn - verléieren, respektiv datt se och nach d'Kannergeld verléieren, soudatt ënnert dem Stréch déi meescht Leit léiwer bei där Situatioun bliewen, datt d'Kanner offiziell am Ménage bliewen. Dat ass fir ganz vill Elteren e seriösen Handicap, wa se mussen esou Zommen ausginn.

*Motion 2**La Chambre des Députés*

- *considérant que les frais de scolarité et de logement auprès des universités et écoles supérieures ne peuvent jusqu'à présent être déduites du revenu imposable des parents à titre de charges extraordinaires que jusqu'à un plafond de 139.200 Luf qu'à condition de renoncer aux allocations de famille;*

- *considérant que ces frais atteignent le plus souvent des montants annuels largement supérieurs;*

invite le Gouvernement

- *à permettre la déductibilité fiscale à titre de charges extraordinaires de tous les frais de scolarité et de logement d'étudiants poursuivant des études supérieures à l'étranger qu'ils fassent partie ou non du ménage des parents.*

(s.) *Jacques-Yves Henckes, Gast Gibéryen, Fernand Greisen, Aly Jaerling, Jean-Pierre Koepp.*

Deen zweete Beräich, wou ech bedauern, dass an dësem Projet de loi näischt geschitt ass, sinn d'Frais de logement. Och do muss ee feststellen, datt am Ausland, nieft de Subsiden, déi d'Studente kréien, notammet a Frankräich, d'Universitätsstudenten eng Allocation mensuelle de logement kréien. Déi Allocation mensuelle de logement beleeft sech a Frankräich op 6.000 Frang de Mount.

M. le Président.- Frot Dir d'Wuert, Mme Hennicot?

Mme Erna Hennicot-Schoepges, Ministre de la Culture, de l'Enseignement supérieur et de la Recherche.- Här President, ech war gewinnt, datt ëmmer Huisieren am Sall waren. Ech misst eppes op d'Tribün droen. Dat ass, wéi et schéngt, net méi de Fall. Dofir hunn ech gewénkt, net wéinst dem Här Henckes.

M. le Président.- Dann ass et an der Rei. Fuert virun, Här Henckes!

M. Jacques-Yves Henckes (ADR).- Et muss ee festhalen, datt d'Regierung verschidde Studenten e puer Wunnéngen zur Verfügung stellt, mä dat geet beileiwen net duer. Mir mengen och, datt an engem zukünftege Projet de loi d'Regierung misst d'Méiglechkeet schafen, fir eng Allocation mensuelle fir d'Studente virzegesinn. An deem Sënn gi mer och nach eng Motioun eran.

*Motion 3**La Chambre des Députés*

- *considérant que certains pays européens octroient à leurs étudiants à côté des subsides des aides au logement;*

- *considérant qu'il est dans l'intérêt de notre pays d'encourager les jeunes à poursuivre des études supérieures et universitaires;*

- *considérant que les frais de logement constituent dans de nombreuses villes universitaires une part importante du coût de vie de l'étudiant;*

invite le Gouvernement

- *à élaborer un projet de loi permettant d'accorder aux étudiants poursuivant leurs études supérieures à l'étranger une allocation de logement mensuelle.*

(s.) *Jacques-Yves Henckes, Gast Gibéryen, Fernand Greisen, Aly Jaerling, Jean-Pierre Koepp.*

Deen drëtte Punkt betrëfft d'Gesetz selwer. Sou wéi d'Gesetz elo virläit, hu mir kee Problem, fir deen Text en tant que tel ze stëmmen - mir bréngen och dofir keen Amendement an -, nach hu mir eng Schwierigkeet mat der Definitioun vum Cycle d'études. Dat ass eng Affär vun Ausleeung a Praxis, wéi een dat gesäit.

Bis elo ass d'Praxis déi gewiescht, datt de Ministère d'Definitioun ugeholl huet vum Cycle d'études, deen an deem jeeweilege Land a fir déi jeeweileg Studië gegollen huet. Dat féiert zu Ongerechtegkeeten ënnert de Studenten. Beispillsweis muss een, fir e Professorat ze maachen, a Frankräich véier Joer Uni hunn, dat heescht zwee Cyclë vun zwee Joer. Wann een awer elo an England geet, da kritt een deeselwechten Diplom mat darselwechter Reconnaissance no dräi Joer. Mä a Frankräich kritt de Student zwou Primes d'encouragement ausbezult, wann en an England geet, nëmmen eng.

Mir mengen dofir, dass d'Ausleeung vum Cycle d'études misst hei no lëtzebuergesche Kritäre geschéien, datt zum Beispill an England no dräi Semesteren eng Prime d'encouragement misst ausbezult ginn, wat deen Abléck déi Studenten, déi an England ginn, an déi, déi a Frankräich oder an der Belsch sinn, op e Pied d'égalité géif stellen.

Datselwecht hu mer bei de Medezinstudenten. Si kréien, wann een déi franséisch Gesetzgebung vun de Cycles d'études iwwerhëlt, innerhalb vu siwe Joer Studien zwou Primes d'encouragement ausbezult. Mir mengen, datt dat ongerecht wier vis-à-vis vun deenen, déi en Diplom och an zwee Cyclë kréien, mä no véier Joer. Dofir si mer der Meenung, datt bei Medezinstudien de Cycle d'études och no zwee Jor soll gëllen, wat dozou géif féieren, datt e Medezinstudent a Frankräich dräi Primes d'encouragement iwwert déi siwe Jore géif kréien, statt, wéi bis elo, nuren zwou.

Deen anere wichtege Punkt, deen hei an der Debatt stoung, ass, fir géint den Tourisme étudiant virzegoen. Ech mengen, mam Prinzip kann een d'accord sinn, mä och do géif ech Iech bieden, mat grousser Virsiicht un déi Ausleeungen do erunzegoen. Firwat? Well an deenen eenzelne Länner eng aner Politique universitaire en matière vu Sclaritéit gemaach gëtt.

Zum Beispill ass et a Frankräich sou, datt während där ganzer Zäit wéineg Selektioun ënnert de Studente gemaach gëtt, datt d'Selektioun sech herno méi iwwert d'Concours d'entrée um Aarbechtsmaart mécht, währenddeems an Däitschland beispillsweis - bei den

Ingenieure speziell - d'Selektioun scho während de Schouljore gemaach gëtt, an dat op eng ganz sec Aart a Weis. Och do, mengen ech, misst déi Kommissioun, déi dat analyséiert, no deenen eenzelne Länner a Studië kucken, wa se dee Kritär vum Tourisme étudiant wéilt op eng negativ Aart a Weis fir de Student uwenden.

Wat d'Notioun ugeet vun de Cycles d'études, Mme Minister, erlabe mer eis, och an enger Motioun, d'Regierung opzefuerderen, fir déi Notioun no lëtzebuergesche Kritären ze interpretéieren an net einfach d'Kritären aus dem Ausland ze iwwerhuelen, well dat géif zu Ongerechtegkeete bei de Studente féieren. Ech wëll och drop hiweisen, datt dat hei och eng Fuerderung ass, déi vu verschiddene Studentenassociatiounen gemaach gëtt. Mir mengen, datt hir Fuerderungen an dësem Sënn, wéi mer et och an der Motioun soen, berechtigt wieren.

Ech hoffen och, datt weder vu Säite vun der Regierung nach vun der Presidentin vun der Erziehungskommissioun Objektione wäerte kommen. Mir wieren awer och bereet, wann dat gewënscht gëtt, dës Motioun nach eng Kéier an der zoustänneger Kommissioun mat der Regierung an deenen anere Membere vun der Kommissioun ze diskutéieren.

Motion 4

La Chambre des Députés

- *considérant que la durée des cycles d'études varie en fonction de la nature des études et des pays;*

- *considérant que dans certains pays, dont l'Allemagne, et pour certaines études la durée normale des études est systématiquement dépassée d'une à deux années;*

- *considérant que dans certains pays, dont la Grande-Bretagne, et dans des Hautes Ecoles de renommée mondiale, des études similaires que ceux se pratiquant en France et en Belgique en quatre années se font en seulement trois années;*

- *considérant que selon le texte de la loi votée les étudiants accomplissant des études universitaires en trois années n'auront droit qu'à une seule prime d'encouragement au terme de leurs études et que les étudiants en médecine qui ont des cycles de trois respectivement de quatre années ne bénéficieront qu'à deux reprises des primes d'encouragement pour des études qui se répartissent sur sept ans;*

- *considérant qu'il est nécessaire de veiller à l'équité financière entre les étudiants;*

invite le Gouvernement

- *à appliquer la présente loi de sorte à adopter une définition proprement luxembourgeoise du terme "cycle d'études" en retenant pour les Hautes Ecoles et le Royaume-Uni l'équivalent de trois semestres pour un cycle et retenant pour les autres études, notamment médicales, des cycles de deux années;*

- *à faire élaborer par la commission consultative instituée une note annuelle sur l'interprétation et l'application de la présente loi tenant compte de l'évolution des divers systèmes d'enseignement supérieur.*

(s.) Jacques-Yves Henckes, Gast Gibéryen, Fernand Greisen, Aly Jaerling, Jean-Pierre Koepf.

M. le Président.- D'Mme Nelly Stein freet d'Wuert.

Mme Nelly Stein (CSV), rapporteur.- Ech wéilt dem Här Henckes eng Fro stellen.

Den Här Henckes huet léif an interessant Propose gemaach, mä ech wollt hie froen, firwat hien ni an d'Kommissioun komm ass, fir do seng Proposen ze maachen a seng Iddie virzebréngen. Do hätt hie scho kënnen eng Äntwert kréien, anstatt dass hien elo alles hei am Plenum virbréngt. Dat ass eng total nei Prozedur, déi den Här Henckes elo hei uwend. Ech wollt hie just froen, firwat dat esou wier.

Une voix.- Très bien!

M. Jacques-Yves Henckes (ADR).- Ech kann direkt dorop äntweren.

Éischtens sinn ech guer net Member vun där Kommissioun.

(Interruptions)

Dat Zweet ass, datt ech geduecht hunn,...

Mme Nelly Stein (CSV), rapporteur.- Dir sollt awer ersetzen, Här Henckes!

M. Jacques-Yves Henckes (ADR).- Jo, mä...

Mme Nelly Stein (CSV), rapporteur.- Et war awer keen do vum ADR!

M. Jacques-Yves Henckes (ADR).- ...ech mengen, et ass esou, datt een an den Diskussiounen gemierkt huet, datt verschidde Problemer waren, a mir hunn an eiser Fraktioun gekuckt, wéi mer kéinten eng adequat Reaktioun fannen, an déi adequat Reaktioun ass hei an der Chamber, am Plenum ze fannen.

Vu datt et jo keng Gesetzesännerung ass um Text - mir wollten de Projet net weider ophalen -, menge mer, datt kann iwwert déi Ausleeungsbestëmmung, wéi mir se virschloen, virum Vote vum Gesetz diskutéiert ginn, mä et ka grad sou gutt nom Vote vum Gesetz stattfannen. Dat changéiert näischt um Fong.

M. le Président.- D'Wuert huet elo den Här Robert Garcia.

Mme Nelly Stein (CSV), rapporteur.- Ech fannen dat schlëmm!

M. Robert Garcia (DÉI GRÉNG).- Här President, Dir Dammen an Dir Hären, mir hu gëschter hei e Reglement gestëmmt, wou mer opgefuerdert ginn, manner ze schwätzen an dofir méi ze verdéngen. Obwuel dat

Reglement eréischt am Juni a Kraaft trëtt, wäert ech mech elo schonn drun halen.

(Hilarité)

Ech fannen et effektiv superfétatoire, wann een als Sechsten nach eng Kéier déiselwecht Steng un d'Rulle bréngt, déi d'Mme Stein hei schonn excellent un d'Rulle bruecht huet. Ech wëll hir dofir merci soen, dass se eigentlech alles gesot huet zu deem iwweraus excellente Gesetz, dat mir och wäerte stëmmen.

Ech kéint elo natierlech nach wäit aushuelen an allgemeng zur Héichschoulpolitik schwätzen, mä ech referéiere mech do op d'Interpellatioun vum Kolleeg Ben Fayot. Dat wäert jo hoffentlech nach dëst Joer iwwert d'Bühn goen, dass mer kënnen "in profundis" an "de profundis" iwwert déi Matière diskutéieren.

Ech wëll just déi Remarque maachen, dass effektiv déi méi strikt oder méi large Ausleeung vun deem sougenannte Studententourismus e Problem ass, deen och deen eenzegen ass, deen opgeworf ginn ass vun de representativen Organisatiounen, deen awer sécherlech an de Reglementer genuch Spillraum fënnt, fir op eng adequat Manéier regléiert ze ginn.

Wéi gesot, ech bréngen den Accord vu menger Fraktioun, wëll awer nach e kleng Pefferkär bäileen zu engem Thema, dat mech a 40% vu menger Fraktioun, well se dat scho matgemaach hunn, speziell interesséiert, wou och den Här Fayot eng Motioun deponéiert huet, déi sech e bëssche vu menger, déi ech wäert deponéieren, ënnerscheed, an dat ass den Enseignement à distance, d'Fernstudien, déi hei zu Lëtzebuerg relativ ënnerrepresentéiert sinn.

Wann ech eng Äntwert, déi d'Mme Minister mir de 16. Februar op eng Question parlementaire ginn huet, liesen, da fannen ech, dass am akademesche Joer 1998-1999 nëmme 24 Studenten a Studentinnen op der Open University an nëmme zwou Studentinnen op der Fernuniversitéit vun Hagen ageschriwwen waren. Dat schéngt mer relativ wéineg, well wann een déi potenziell Clientèle vu sou Fernstudië kuckt, da muss ee vläicht ënnerscheeden tëschen deenen, déi elo en Initialstudium ufänken, well se en anert net kënnen maachen - dat sinn haaptsächlech kierperlech behënnert Leit -, an déi zweet Kategorie vu Leit sinn déi, déi schonn entweder e Studium hunn an e weidert wëlle maachen, oder kee Studium hunn a sech e bëssche méi spët entscheeden, fir niewent hirem Beruff sou e Studium ze maachen.

Ech hu mer an der Äntwert op déi Question parlementaire soe gelooss, dass effektiv iwwert dat heite Gesetz déi Problematik net ka regléiert ginn, well déi sech effektiv vun de Besoins financiers och wesentlech ënnerscheed, haaptsächlech well déi Leit net müssen an d'Ausland goen an do Dépensen hunn. Do stellt sech de Problem vläicht éischter am Beräich vum Congé d'éducation, dee se dofir beanspruchen, quitte datt eng Partie vun deene Leit och kéinte Boursé beanspruchen.

Ech liesen zum Schluss vun där Äntwert op déi Question parlementaire dee Saz: "Par ailleurs, dans une

étape ultérieure, il conviendra de doter le secteur de l'enseignement à distance d'une réglementation y afférente et de fixer les critères pour l'attribution de bourses d'études pour un enseignement à distance."

Ech hunn dee leschte Saz als Grondstee geholl fir eng Motioun, déi effektiv d'Regierung dann nach eng Kéier nodréiglech opfuert, an de beschten Délaien Aarbechten unzefänken, fir den Enseignement à distance net nëmme finanziell, mä och strukturell ze regléieren.

Ech soen Iech merci.

Motion 5

La Chambre des Députés

- saluant le vote du projet de loi concernant l'aide financière de l'Etat pour études supérieures;

- constatant qu'en dehors des parcours d'études continues le domaine des études à distance a tendance à se développer;

- constatant que les étudiant(e)s inscrit(e)s dans l'enseignement supérieur à distance ne sont pas concerné(e)s par la loi citée;

- soucieuse que les personnes engagées dans des études supérieures à distance puissent bénéficier, en cas de nécessité économique, de subsides et de bourses de la part de l'Etat suivant des modalités spécifiques;

- saluant l'intention du ministère de "doter le secteur de l'enseignement à distance d'une réglementation y afférente et de fixer les critères pour l'attribution de bourses d'études pour un enseignement à distance";

invite le Gouvernement

- à entamer dans les meilleurs délais des travaux en vue de réglementer le secteur de l'enseignement à distance, et notamment de fixer les critères d'attribution de bourses d'études.

(s.) Robert Garcia, François Bausch, Camille Gira, Jean Huss, Renée Wagener.

Plusieurs voix.- Très bien!

M. le Président.- Als leschten Diskussionsriedner ass den Här André Hoffmann agedroen. Den Här Hoffmann huet d'Wuert.

M. André Hoffmann (déi Lénk).- Här President, et gëtt awer net grad sou kuerz wéi beim Här Garcia, mä bal.

Mäin Noper hei an der Chamber huet mer elo sou e schéint chinesescht Spréchwuert gesot, dat ech Iech net kann erspueren: Wann s De fir ee Joer plangs, da planz Räis, wann s De fir ee Jorzéngt plangs, da planz Beem, a wann s De fir ee Jorhonnert plangs, da suerg fir Bildung an Ausbildung vun Denger Bevölkerung.

Une voix.- Wie war dat?

M. André Hoffmann (*déi Lénk*).- Et ass e chinescht Spréchwuert.

Une voix.- Wien?

(*Interruptions*)

M. André Hoffmann (*déi Lénk*).- Ah! Den Noper heibannen.

(*Interruptions et hilarité*)

En aalt chinescht Spréchwuert, Här Lux.

Wat domat sollt gesot ginn, ass, dass d'Bildungsfro eng vun de groussen Prioritéiten hei zu Lëtzebuerg muss sinn.

Am Rapport vun der Kommissioun gëtt déi Modificatioun vum Gesetz iwwert d'Studiëbäihëllefen haaptsächlech domat begrënn, dass do steet, obwuel dass scho relativ generéis Effort an der Vergaangenheet gemaach gi wäeren, wär d'Zuel vun de Lëtzebuerger oder deenen, déi hei zu Lëtzebuerg residéieren an Héichschoulstudie maachen, "insuffisant par rapport à l'étranger". Doraus gëtt dann ofgeleet, dass d'Studiëbäihëllefe sollen erhéicht, respektiv verbessert ginn. Ech sinn domat och d'accord.

Allerdéngs, wann een d'Fro opwerft vun der Zuel vun den Héichschoulstudenten hei zu Lëtzebuerg, da werft een déi global Fro op vun der Demokratiséierung vun eisem Bildungssystem, an déi fänkt net eréischt un no Première, mä virdrun. Domat ass natierlech d'Fro vun der Chancëgläichheet opgeworf, an dat huet net nëmmen eppes mat Suen, respektiv finanziellen Ënnerstëtzen ze dinn, och wann dat ganz wichteg ass.

Dat heescht, wann een déi Fro vun der Demokratiséierung vun eisem Bildungssystem ënnersicht a kuckt, wéi déi sech och um Niveau vun den Héichschoulen ausdréckt, da muss een d'Struktur vun eiser Bevëlkerung ënnersichen a kucken, wéi déi sech dann och um Niveau vun den Héichschoulen erëmispigelt oder net.

Fréier hate mir sou Zuele wéi déi hei zur Verfügung duerch d'Statistiken: Op den Unie manner wéi 10% Kanner aus Aarbechterkreesser, obwuel d'Aarbechter méi wéi 50% vun der Bevëlkerung uitgemaach hunn. Dat ass d'Fro vun der Demokratiséierung, dat heescht, ëmgedréit, vun engem am Fong geholl nach net genuch demokratesche Schoulsystem. Haut hu mer keng, oder ech jiddefalls hu keng Zuele méi zur Verfügung, well menges Wëssens no déi do Zorte vu Statistiken net méi ausgeschafft oder jiddefalls net méi publizéiert ginn.

Ech kann awer net dervun ausgoen, dass dat do sech wesentlech verbessert hätt, an dofir sinn ech och e bësschen skeptesch par rapport zum Här Fayot senger Behauptung, dat Gesetz vun 1977 hätt zu enger Demokratiséierung bäigedroen um Niveau vun den Héichschoulstudien, well ech kann dat net iwwerpräifen.

M. Ben Fayot (*LSAP*).- Et sollt!

M. André Hoffmann (*déi Lénk*).- Et sollt, awer ob et an der Praxis derzou bäigedroen huet, dat misst een, wéi gesot, nach iwwerpräifen, an ech sinn do äusserst skeptesch.

Déi Zuelerapporen, déi ech elo genannt hunn, sinn der aus de 60er, 70er Joren. Wann een eis Bevëlkerungsstruktur haut kuckt, dann huet sech dat an deem Sënn nach gewässermoosse verschlechtert, well den Undeel vun den Auslännerkanner entre-temps vill méi grouss ginn ass an déi méiglecherweis nach méi Schwieeregkeeten hu wéi fréier déi Lëtzebuerger Aarbechterkanner, well se net nëmmen duerch sozial Problemer ënner Ëmstänn doru gehënnert ginn, fir Studien ze maachen, mä well bei deenen och nach de Sproocheproblem, de kulturelle Problem a sou weider derbäi kënn.

Doriwwer schwätze mer net genuch! Mir schwätzen net genuch iwwert d'Demokratiséierung vun der Schoul aus soziale Considératiounen eraus. Wéivill Prozent Kanner aus der Escher Brillschoul, aus der Uewerkuerer Peschkopp oder vun der Garer Schoulen an der Stad ginn op d'Uni? Ech kennen déi Zuelen net, ech sinn awer iwwerzeugt, dass et der ganz, ganz weening sinn. Ech mengen och, dass mer dee Problem do net eleng geléist kréien, doduerch dass mer d'Studiëbäihëllefen um Niveau vun den Héichschoulen erhéijen, respektiv verbesseren, obwuel ech, wéi gesot, domat d'accord sinn.

Et gouf emol fréier, wat déi Studiëbäihëllefe betrëfft, Fuerderungen, virun allem vun der Studentenorganisatiounen, fir e Prêt-salaire fir all d'Studenten. Dir kennt déi Fuerderunge wahrscheinlech nach, jiddefalls déi vu menger Generatioun. Et gouf an den 90er Jore vu Studentenorganisatiounen d'Fuerderung - an dat ass am Fong geholl ähnlech wéi dee Prêt-salaire -, all Student sollt e Grondakommes kréien an Héicht vum RMG, mat der Begrënnung, dass si jo eigentlech déiselwecht Grondbedürfnisser hu wéi jidferen. Deen RMG sollt awer net gebonne sinn u sozial Kritären.

Ech muss soen, dass ech vis-à-vis vun deene Fuerderungen allerdéngs och ëmmer meng Bedenken hat, an och haut nach hunn, well ech der Meenung sinn, dass se soziale Considératiounen och net Rechnung droen, a well ech der Meenung sinn, dass Elteren, déi sech et kënnen leeschten, och finanziell sollen derzou bäidroen, dass hir Kanner Studie maachen op der Universitéit. Ech sinn also och d'accord, dass een do sozial Differenzéierung mécht, sou wéi dat an eisem System virgesinn ass.

Ech wëll nach eng Kéier ganz kuerz op déi Fro vun der Universitéit zu Lëtzebuerg kommen. Dat fänkt un, sou e bësschen e Steckenpferd vu mir ze ginn. Et ass mat Sécherheet esou, dass virun allem Kanner aus méi schwache soziale Milieuen awer och duerch déi Perspektiv, dass, wa se Héichschoulstudie maachen, se da mussen an d'Ausland goen, ofgeschreckt ginn, respektiv hir Elteren, well dat jo awer méi Käschte mat sech bréngt, wéi wa se hei zu Lëtzebuerg op enger Universitéit - an da mengen ech ëmmer eng Universitéit, och mat deenen ënneschte Cyclen - kéinte studéieren.

Dat ass ee vun de Grënn, firwat ech fir eng Uni zu Lëtzebuerg plaidéieren, allerdéngs net deen eenzeg. Ech war jo elo viru kuerzem beim Etat de la Nation dorop zréckkomm. Ech wëll dofir och kuerz dem Här Wiseler äntweren: Ech plaidéieren net derfir, dass eis Studenten net méi an d'Ausland ginn. Ech wollt just dat mat de Beispiller Tréier a Stroosbuerg e bëssche relativéieren, wat dee groussen Horizont betrëfft.

Ech sinn der Meenung, dass eis Studente sollen am Ausland studéieren, mä ech mengen awer, dass grad am Kader vun den europäeschen Netzer, déi den Här Wiseler selwer genannt huet, dat absolut méiglech ass, an ënner Ëmstänn souguer ganz gutt organiséierbar, och dann, wa mir zu Lëtzebuerg Universitätsfakultéiten hunn, och vun deenen ënneschte Cyclen. Am Kader vun europäeschen Netzer kann een duerchaus organiséieren, dass do eng Verbindung ass, dass och do eis Lëtzebuerger Studenten net nëmmen zu Lëtzebuerg ëmmer sëtze bleiwen, mä och an d'Ausland ginn. Mir hunn awer dee Virdeel, dass mer - wéi ech dat beim Etat de la Nation gesot hunn - de wëssenschaftlechen a kulturelle Wand aus dem Ausland op méi eng direkt Aart a Weis op Lëtzebuerg huelen.

Ech hu bei där Diskussioun iwwert d'Gesetz, dat mer gëschter diskutéiert hunn, gesot, ech hätt verschidden Avie vermësst. Ech hunn och hei an eiser Dokumentatioun verschidden Avie vermësst. Ech froe mech, firwat dass bei sou enger Fro, déi e sozialen Impakt huet, net och d'Chambre du Travail oder d'Chambre des Employés gefrot ginn. Ech mengen, dass déi och do Iwwerleeungen ze ënnerbreeden hätten, déi derwäert wäeren, gekuckt ze ginn. Ech bedauern et och, dass - jiddefalls an deenen offiziellen, déi mir zougestallt kritt hunn - och keng Avie vun de Studentenorganisatiounen selwer ze fanne waren. Déi huet ee sech dann an hir eege Publikatiounen misse siche goen. Ech fannen awer, dass déi och kéinten a sou Rapporen zur Verfügung gestallt ginn.

Et sinn an deem Gesetz, dat mer elo virun eis leien hunn, eng Rei vu Verbesserungen par rapport zu deem Gesetz, wéi et virdu bestanen huet. Déi éischt Fassung, déi d'Regierung virgeluegt hat, ass och nach wesentlech an der Kommissioun verbessert ginn.

Dat ass elo esou oft opgezielt ginn, dass ech dat bal net méi bräicht ze widderhuelen.

Ech wëll awer e puer Saache soen, wou ech fannen, dass se besonnesch wichteg sinn. Déi Geschicht vum 3e Cycle ass wichteg. Déi Ausdehnung op net-communautaire Studenten ass fir mech och ganz wichteg, grad esou wéi op d'politesch Flüchtlingen; och déi net-communautaire. Mir ware virun an där paradoxaler an och onge rechter Situatioun, dass zum Beispill Kanner aus capverdianesche Familljen - och wa se laang hei zu Lëtzebuerg gelieft hunn - eigentlech no deene strikte restriktive Bedingunge vun deem Gesetz virun, keng Aide pour études supérieures konnte kréien. Dat ass jo absolut anormal gewiescht.

Ech begrëssen och, dass dee Coefficient familial elo op 1,75 fir jidderee gemaach ginn ass. Virdu war et esou,

datt do 0,85 pro Elterendeel stung. Dat bedeit eng Benodeelegung vun de Familles monoparentales. Ech mengen, dass d'Familles monoparentales datselwecht zegutt hätten, fir net ze soen, souguer méi, well déi ganz oft an enger sozial méi schwieriger Situatioun sinn, wéi d'Famillje wou zwee Partner zesumme sinn.

Wat ech och begrëssen - an dat ass och an der Kommissioun als Verbesserung geschitt -, ass dass bei Studenten, déi eng Charge de famille hunn, net ënnerscheet gëtt tëschent deenen déi bestuet sinn an deenen déi net bestuet sinn. Ech mengen, dass dat Differenzéierung sinn, déi iwwerholl sinn. Dat sinn Differenzéierungen, déi net méi zäitgemäss sinn an déi een och an esou Gesetzer net méi berücksichtge soll.

Ech hat d'Zäit net méi fir dat nozerechnen, mä et wär awer wichteg ze wëssen, wéi dat Gesetz hei sech a konkrete Situatiounen auswierkt. Et wär interessant - wann net haut, da méi spéit - fir vläicht an der Kommissioun Beispiller virgeluegt ze kréien. Beispiller, fir ze gesinn, mat wéi engem Akommen a wéi enger sozialer Situatioun dee betreffende Student de volle Maximum iwwert d'Bourse kritt, dat heescht, ouni dass en op e Prêt brauch zréckzegeäifen.

Dat ergëtt sech net aus dem Gesetz. Dat ergëtt sech aus dem Règlement grand-ducal. Mä wéi gesot, dass hunn ech net nogerechent. Och an deenen Erklärungen, déi mir haut hei vun der Madame Rapportrice kritt hunn, ware keng där Beispiller dran. Déi sinn awer wichteg, fir dass een de sozialen Impakt wierklech berechnen kann.

Ech sinn och der Meenung, dass déi wierklech Liewenskäschte vun de Studenten ëmmer erëm mussen iwwerpréift ginn. Ech kann net iwwerpréifen, ob déi Zomm, déi hei drasteet, als Maximum deene wierklech entsprécht. Ech hunn iwwerhaupt meng Bedenken, ob een iwwerhaupt een eenzege Maximum do kann drasetzen, well d'Liewenskäschte sinn ënnerschiddlech, jee no Land oder Stad, esou dass ech mech froen, ob een dat net misst differenzéieren.

Am Ausland gëtt et Rapporen iwwert d'sozial Lag vun de Studenten an iwwer hire Bedarf. Ech weess net wéi wäit et déi zu Lëtzebuerg gëtt. Wann et déi net gëtt, da wär et dréngend fir esou Untersuchungen ze maachen, fir wierklech de reale Käschte Rechnung ze droen.

Dann hunn ech och meng Bedenken, ob et duergeet, wann een dee Bedarf do nëmmen nom Lëtzebuerger Index héicherechent. Geet dat wierklech duer fir der realer Entwécklung vun de Käschten an deene verschiddenen anere Länner Rechnung ze droen? Ech stelle mir d'Fro, ob een do net misst aner Parameter virgesinn, wéi zum Beispill d'Evolution vun de Wunnéngskäschten a verschiddene Länner, fir wierklech der Evolution Rechnung ze droen.

Eppes Ähnlech gëllt och fir d'Studienzäiten. Mir setzen do eng relativ strikt an och restriktiv Bestëmmung an, andeems mir d'Regelstudienzäite plus ee Joer festhalen. Et dierf een ee Joer dobäisetzen, ouni seng Studiëbäihëllefen ze verléieren. Ech mengen, dass ee sech

do awer och misst froen, wéi déi real an duerchschnëttlech Studienzäite sinn. Well dat hänkt net onbedéngt nëmme vum gudde Wëllen, vun der Motivatioun oder vum Kënne vum Student of, mä dat kann och dovun ofhänken, wéi eng Universitéit funktionéiert a wéi d'Bedingungen op der Universitéit sinn.

Esou datt ech awer mengen, datt et méi richteg a gerecht wär, fir déi duerchschnëttlech Studienzäiten ze berechnen, amplaz do esou eng restriktiv an administrativ fixéiert Regelstudienzäit festzehalen, wou een - wann een déi iwwerschratt huet - keng Studiëbäihëllef méi zegutt hätt.

Dat Gesetz ass awer fir mech - och wann Imperfektionen dra sinn - gutt genuch, fir datt ech et ka stëmmen.

Merci.

M. le Président. - D'Wuert huet elo d'Ministesch fir Héichschoulstudien, d'Mme Erna Hennicot-Schoepges.

Mme Erna Hennicot-Schoepges, Ministre de la Culture, de l'Enseignement supérieur et de la Recherche. - Här President, Dir Dammen an Dir Hären, Äert Reglement huet virgesinn, datt d'Regierung net méi esou laang schwätzen däerf. Ech géif dofir och wëlle meng Interventioun kuerz maachen. Mir hunn zwar d'Paien net gehéicht kritt, mä mir halen eis awer un d'Reglementer vun der Chamber.

Virun allem soen ech der Kommissioun vun der Chamber merci, datt si esou eng gutt Aarbecht gemaach huet. Ech soen och der Mme Stein merci, well si sech esou dofir agesat huet, fir datt mir dese Projet elo kënne stëmmen. Mir kënnen domat seng Mise en vigueur op den éischte Juli fixéieren. Mir kënnen esou deene Studenten, déi mat hire Studien amgaange sinn, de Benefiss vun deem Gesetz ginn.

Et ass selbstverständlech, datt mir hei net dolaanscht kommen, fir och en Iwwerbléck ze maachen, wat de weideren Ausbau vun den Héichschoulstudien an iwwerhaupt eis Héichschoulpolitik hei zu Lëtzebuerg ugeet. Mir hunn de Livre blanc virgestallt. Ech denken, datt mir bei der Geleeënheet vun där Interpellatioun, déi den Här Fayot ugefrot huet, kënnen eng länger Diskussioun iwwert dat Wäissbuch do féieren. Domat wäerte mir och eng interessant Diskussioun iwwert den Entwécklungsplang kréien, deem d'Regierung do virgesinn huet.

Wat am Zesammenhank mam Gesetz vun haut besonnesch wichteg ass, ass datt mir an den nächste Jore wäerte mat enger Mondialisatioun a mat enger staarker Modifikatioun vun der Héichschoullandschaft konfrontéiert ginn, esou datt et onbedéngt noutwendeg ass, datt eist Lëtzebuurger Land ëmmer observéiert, wat d'Mouvementer am Ausland sinn. Mir mussen eis an deem europäesche Kader esou bewegen, datt mir herno och kënne mathalen.

Mir wäerten och net dolaanscht kommen, fir eis Infrastrukturen auszebauen. Mir musse Wunnraum fir Studenten a Chercheuren opbauen an eis fir d'Schafe vun enger Zone d'activité universitaire mat allem wat dozou

gehéiert asetzen. Dat betrëfft den Enseignement supérieur, combinéiert mat der Recherche a combinéiert mat der Kreatioun vun neie Betriber, sougenannt Pépinières d'entreprises, déi mir op d'Been setze mussen.

De Projet de loi gesäit eng Modifikatioun vir, wat d'Strukturen an d'Definitioun vun den Héichschoulstudien ugeet. Et ass selbstverständlech esou, datt mir bei deem Plan de développement, deem am Wäissbuch virgesinn ass, och nach den ISERP an den IEES an de Kader vum Héichschulgesetz vun 1996 wäerten ophuelen. Si sinn awer elo schonn als vollberechtigt Etudes supérieures an deem Projet virgesinn, grad esou wéi d'Formatioun vun engem BTS.

Et gëtt och eng Erneuerung, wat den drëtten Zyklus ugeet. Op dee kënne mir ganz besonnesch eis Recherchepolitik opbauen.

Wa mir iwwert d'Zuele schwätzen, da ginn déi jo eigentlech e kloert Bild of. Den Här Fayot huet zitéiert, wat 1977 gesot ginn ass. Do waren 2.271 Héichschoulstudenten ënnerwee. Mir hunn der an eise Wäissbuch ganz genau 4.243, déi vun den Aides financières profitéieren. Et ginn awer och Studenten - déi genau Zuel kenne mir net -, déi op d'Uni ginn, ouni vun den Aides financières ze profitéieren. Déi hu mir natierlech net an eise Fichier dran. Déi kommen nach do dobäi, sou datt eis Schätzung op 7.000 läit.

Dat si 7.000 Lëtzebuurger, déi entweder hei am Land oder am Ausland an universitäre Studien dra sinn. Wann ech dat op 1977 zrëckrechnen, da muss ech soen, datt des Zuel sech méi wéi verduebelt huet. Do gesäit een eng Entwécklung, déi ganz bestëmmt mam professionellen Environnement ze dinn huet, mä déi awer och mam Gesetz vun den Aides financières, esou wéi et 1977 geschafte ginn ass a wéi et 1992 nach verbessert ginn ass, ze dinn huet.

Well ech gleewen dat, wat an deem Rapport vun den Transferts sociaux opgefouert a bewisen ass. Et ass aus soziale Grënn de Leit hei net verwiert, op d'Universitéit ze goen, wa se an de Benefiss vun deem Gesetz kommen a wa se vun deenen Aidën, déi si do kréien, Gebrauch maachen.

Et ass evident, datt mir eise Prozentsaz mussen eropsetzen, an datt mir méi Leit mussen op d'Uni kréien. Firwat gi se net? Ech menge mir sinn do an enger Situatioun, wou mir nëmme kënne mat Sensibiliséierung reagéieren. Mir hu selbstverständlech all Moyenen agesat.

Mir wäerten och des Kéier am Hierscht eng nei Foire de l'étudiant presentéieren a mir wäerten och nach eng verbessert Orientatioun maachen. Mir wëlle méi Opklärung vun 3e u maachen, wou jo elo schonn deelweis d'Weiche gestallt ginn, fir déi professionnell Bunn, déi de Student spéider hëlt. Mir kënnen do awer net mat Zwang operéieren. Mir mussen et jidderengem iwwerloossen.

Ech wëll awer och dobäi soen, datt eng Zuel am Wäissbuch remarkabel ass, well déi gëtt Opschloss

iwwer Studenten, déi mir z.B. op portugiseschen Universitëiten hunn. Dat sinn der mëttlerweil 24, dat heescht mir hunn d'Vermutung, datt awer och déi portugisesch Kanner mëttlerweil an den Héichschoulstudium eraginn, an zwar net nëmmen an hiert Heemechtsland, mä och a villen anere Länner.

De momentane System vun eisen Aides financières soll een awer och mol mat deem vergläichen, wat am Ausland besteet. Mir hunn op där enger Säit en Deel Bourse non remboursable a mir hunn op där anerer Säit en Deel Prêt, wou de Student censéiert ass déi Suen, wann e bis Geld verdéngt, zrëckzebezuelen.

Mir hunn dann eng Proportioun vun deenen zwee Elementer - Bourse a Prêt -, déi ofhängeg ass vun der sozialer Situatioun vun den Elteren oder vum Student selber. Do hat den Här Hoffmann eng Fro gestallt, wéi d'Applikatioun vun deem Règlement bei der Part "Bourse" an bei der Part "Prêt" wär. Fir de Moment steet an deem jetzege Règlement dran, datt déi Part "Bourse" 50% net iwwerschreide kann. Wann d'Kommissioun an där Richtung eppes wëllt änneren, da solle mir bei der Neifaassung vum Règlement och eng Kéier doriwwer schwätzen.

De Student kann also op déi staatlech Hëllef zréckgräife fir säi kompletten Zyklus plus ee Joer. Déi grouss Diskussioun ass natierlech déi, wat de Regelstudienzyklus ass. Dat ass net esou einfach, wa mir déi ganz Vielfalt vun den Universitéite gesinn, déi mëttlerweil vun eise Studente gewielt ginn.

Ech wëll och deene soen, déi menge mir kéinten dat do op eng lëtzebuergesch Aart a Weis harmoniséieren a lëtzebuergesch Kritären opstellen, fir d'Definitioun vun engem Cycle d'études, datt mir da komplett op der falscher Piste wäeren, well mir eis an engem europäesche Kader befannen, a well mir eis do un déi europäesch Regle vun engem Land zum anere mussen halen an notament och musse gutt oppassen, datt mir awer fir eis Studien d'Unerkennung vun eisen Nopeschlänner net a Fro stellen.

Am Wantersemester 1999/2000 hunn also ganz genau 4.243 Studente vun eiser Aide financière profitéiert. Dovun hunn 2.394 Studente vun engem Prêt profitéiert an 1.849 Studente vun enger Bourse. Dat do gëtt och en Opschloss op d'Situatioun vun der sozialer Stellung vum Student. Dat heescht also konkret, datt während dem leschte Semester ganz genau fir 497,9 Milliounen Prêten accordéiert gi sinn a fir ronn 77 Milliounen Boursen. Op ee Joer héichgerechent wär dat fir 1 Milliard Prêten a fir 160 Milliounen Boursen am Total. An der Moyenne waren dat d'lescht Joer a pro Semester 117.351 Frang fir Prêten an 41.649 Frang fir Boursen pro Student.

De Projet gesäit vir - an ech wëllt dat och nach eng Kéier betounen opschonn d'Mme Rapporteur an hirem Exposé ganz komplett war -, datt den Dossier bei eiser Verwaltung - beim Centre de Documentation, dem fréiere SPOS - anzereeche ass. Déi Sue ginn awer iwwer siwe verschidde Banken ausbezuelte. Munchmol ass do e Mëssverständnis, et sinn also d'Banken déi de Prêt ginn

an déi domat och herno - wann et zum Remboursement kënnt - zu enger gréisserer Disziplin sollen opruffen, well dat ass jo grad den Objet vun där Démarche déi mir gemaach hunn. Et ass un de Banken, fir de Remboursement vum Prêt aktiv ze ginn an och nozesichen, wou de Student ass an dann drop opzepasst, datt verschidden Délaien net iwwerschratt ginn.

Mir hunn an deemselwechte Wantersemester 512 Bourses spéciales vu 40.000 Frang ausbezuelte un déi Studenten, déi kee Retard bei hire Studien haten.

Et muss een dann nach 22, respektiv 51 Studenten derbei rechnen, déi iwwert de System vun den Aides financières ewech nach Boursen fir speziell Studië kréien oder awer als "nécessiteux" considéiert ginn.

Den Här Wiseler hat eng Fro gestallt am Zesammenhang mat dem Cumul vun de Boursen an dem Beräich troisième cycle. Do wäert iwwert d'Reglement an der Kommissioun déi eng oder aner konkret Situatioun ze belichte sinn.

Am Verglach mat den Nopeschlänner kann déi Lëtzeburger Aide financière sech weise loosse. Ech huelen dat akademesch Joer 1995-1996, wat eis e kompletten Iwwerbléck gëtt mat Moyennen, wou mer 75.000 Frang als Bourse ausbezuelte hunn an 205.000 Frang als Prêt. Wann een an Däitschland esou Moyennë rechnet, da gesi mer, dass et do 66.300 Frang Bourse a 66.300 Frang Prêt gëtt. A Frankräich kréien d'Studenten 83.300 Frang Bourse an 52.000 Frang Prêt. An der Belsch, wat Wallounien ugeet, do hunn d'Studente 34.400 Frang Bourse an 48.900 Frang Prêt. Mir leien also gutt ëm dat Duebelt am verglach mat eisen europäeschen Noperen, dat heescht, de Lëtzeburger Student kritt an der Moyenne 280.000 Frang, wougéint säi franséische Studiëkolleg der 136.000 kritt, den Däitschen 132.000 an de Belsch aus Wallounien 83.000 Frang. Mir sinn do also net esou schlecht gestallt, a mir hu mat deem Gesetz nach eng zousätzlech Verbesserung bruecht, déi derzou féiere wäert, dass eis Aide financière europäesch eng Spëttereiderfunktioon kritt.

D'Ausweidung vun dem Begrëff Enseignement supérieur léisst natierlech déi Studiëgänger, déi zu Lëtzebuerg ugebuede ginn, zou, a berücksichtegt och net universitär Studien, wéi zum Beispill een DUT oder ee BTS, oder méi laang Studië vu véier oder vu sechs Joer, Typen vu Bac + 3, wéi de Bachelor, an zum Schluss dann och de postuniversitäre Beräich vun engem drëtten Zyklus, wou munchmol d'Denominatiounen ganz verschidde sinn.

Mir hunn awer och bei de Frais d'inscription e Schrapp méi wäit gemaach. Mir hu bei de Frais d'inscription eng ganz grouss Diversitéit, well d'Studenten an esou vill verschiddene Länner studéieren, ëmmer méi och an Amerika, an England, a Kanada, wou mer wëssen, dass d'Frais d'inscription ganz deier sinn. Mir hunn de Maximum eropgehuewen op 100.000 Frang pro Joer, déi d'Regierung bäileet. Ech weess, dass mer an deem Beräich deen een oder anere Problem hunn. Mir kënnen dem Student nach derzou 50% vun de Frais d'inscription

als Bourse zegutt rechnen, wat dann nach eng zousätzlech Aide financière ass.

Wat den troisième cycle ugeet, mengen ech, wär weider kee Kommentar ze maachen a weider keng Fro ze beäntweren. Ech wëlt awer am Detail op dat agoen, wat vun den honorablen Deputéierten haut hei gesot ginn ass.

Ech denken, dass dëst Gesetz e wichtege Schrëtt ass, mä wéi all Gesetz ass et ëmmer nëmmen e Schrëtt an déi Investitioun vu Wëssensvermittlung an an déi Gesellschaft vu Wëssen, déi mer amgang sinn ze ginn. Fir déi rentabel ze maachen, huet d'Regierung sech awer och budgetär Mëttel ginn, déi natierlech deene sollen zegutt kommen, déi de Benefiss dervun herno wäerten hunn, sief dat, dass se eng Aarbechtsplaz iwwerhaapt fannen, eng gutt bezuelten Aarbechtsplaz, an domat wichteg Ressourcë fir eist Land bedeiten.

Zu der Garantie huet den Här Ben Fayot nach e puer Froen opgeworf, déi vläicht erkläert musse ginn. Ech hunn d'ënescht gesot, dass déi Prête iwwer d'Banken lafen. Wann elo de Stat mat der Garantie derhannert steet, an net e bëssen Zwang och mécht, dass déi Remboursementer solle geschéien, lafe mer op där Säit Gefor, dass d'Dossieren net esou genee suivéiert ginn, well jo d'Garantie vum Stat spilt, dat heescht, d'Bank huet kee Risiko. Am Sënn vun der gerechter Exekutioun vun deene Gesetzter ass et keng gutt Aart a Weis, wa Studenten op eemol mierken, dass se mat enger schlechter Zahlungsmoral besser ewechkomme wéi hir Kolleegen. Dofir ass schon der Regierung dat Signal eppes wäert, dass deen, deen net rembourséiert awer herno soll gefuerdert ginn.

Et ass wuelverstanen eng Fro vun Datenschutz, mä et ass awer och méiglech, dass mer mat der Signalwierkung, déi mir hunn, scho Resultater kréien. Et ass wéi bei anere Gesetzter, wou bei Remboursementer den Enregistrement materugezu gëtt. Déiselwecht Mechanismen, déi sollen och hei spillen. Mir haten z.B. de Fall vun engem Student, deen e weideren Délai fir säi Remboursement gefrot huet, deen awer gläichzäiteg e Prêt fir Logement lafen hat, an dat Duebelt vun deem, wat en nach als Prêt ausstoen hat, als TVA zréckbezuelt kritt. Dee Moment hu mer gesot, datt een awer emol fir d'ëischt seng Schold beim Stat muss begläichen, ier een nei Recettë kritt.

An deem Sënn ass déi Iddi zréckbehale ginn. Déi ass och mat de Studentenorganisatiounen duerchgeschwat ginn, well et ass jo net esou, wéi wa mer dat Gesetz hei gemaach hätten an net mat de Studenten diskutéiert hätten. Ech war zweemol op der REEL, déi eng Kéier zu Wien, déi aner Kéier zu Karlsruhe, wou et all Kéiers ëm Detailfroen vun deem Gesetz gaangen ass, a wou mer weitgehendst de Studenten an hiren Doléancen entgéintkomm sinn, notament wat d'Prime d'encouragement mat dem Bachelor op dräi Joer ugeet. Dat ass eng Doléance vun de Studente gewiescht, déi mir och an deem Sënn berücksichtegt hunn.

Fir op dem Här Fayot seng Fro zréckzekommen, wat d'Onofhängegkeet vum Student ugeet, hu mer elo mat dem drëtten Zyklus eng ëischt Etapp. Méi a méi Studente

ginn onofhängeg vun hiren Elteren. An der Praxis ass et esou, dass et Meinungsverschiddenheete ka ginn tëschent dem Student a sengen Elteren, hie weiderstudéiere wëllt goen an d'Eltere soen: Et geet elo duer, mir bezuelen net méi. All Kéiers an deene Fäll, wann et Konflikter gëtt, ass d'Praxis déi, dass de Student als Indépendant berücksichtegt gëtt, wann en net méi op der Pailëscht vu sengen Eltere steet, dat heescht, selwer säi Kannergeld kritt - dat kann een ufuerderen -, an domat stellt am Fong d'Verwaltung d'Onofhängegkeet vum Student vu sengen Eltere fest. Dat ass eng Praxis, déi schon esou leeft, dass also do deene jonke Leit hire Fräiraum net esou ageschränkt ass. Am Fall vu Konflikt mat den Elteren gi se als Indépendant an onofhängeg vum Revenu vun den Eltere considéiert, wat dann awer als Konsequenz huet, dass an deem Stot dee Student net méi als Kand ka berücksichtegt ginn, steuerlech a wat säi Kannergeld ugeet.

M. le Président.- Den Här Ben Fayot huet d'Wuert fir eng Fro ze stellen.

M. Ben Fayot (LSAP).- Mme Minister, ech verstinn dat do. Dat licht mer och an. Wann een déi Interpretatioun am Gesetz ka maachen, da kënn ech mir virstellen, dass fir Adulten, déi Universitätsstudië maachen, Fernuniversitéit zum Beispill, dat Gesetz keen Obstacle duerstellt, fir déi och als Indépendants mat an de Benefiss vun deem Gesetz eranzehuelen.

Mme Erna Hennicot-Schoepges, Ministre de la Culture, de l'Enseignement supérieur et de la Recherche.- Dat ass Är Motioun, Här Fayot. Ech kommen herno drop zréck, wann Der erlaabt. Do komme mer op ganz aner Definitiounsschwieregkeeten, well Dir schwätzt vun Adulten. Do misste mer definéieren, wien dann e Student ass.

Mir hunn eng Fro gestallt kritt vum Här Xavier Bettel, wat d'Mise en vigueur ugeet. Et ass ganz klor esou, dass d'Mise en vigueur vun deem Gesetz den 1. Juli ass, an een innerhalb vun engem Joer eng Demande ka maachen, fir eng Prime d'encouragement ze kréien. Dann zielt den Datum vum Diplom. Deen, deen no dem 1. Juli seng Demande mécht an den Datum vum Diplom virweist, wann en an der Regeldauer seng Studien ofgeschloss huet, dee kann d'Prim kréien. Iergendwann fänkt all Gesetz eng Kéier un. Mir hunn de Prinzip, dass et keng Retroaktivitéit vun de Gesetzter gëtt. Fir op dat Beispill zréckzekommen, wat Dir genannt hutt: Deen, deen eng zweet Sess kritt, deen huet dee Moment säin Diplom, deen huet natierlech och e Recht, wann en an der Regelstudiendauer ass, fir seng Prime d'encouragement ze kréien.

M. Xavier Bettel (DP).- Een deen zum Beispill de 25. Juni fäerdeg ass mat senger Uni, de 26. Juni ass d'Délibération du jury, de 27. Juni kritt e säin Diplom, den 1. Juli ass en net méi Student, e ka souguer den 29. Juni ufänke mat schaffen, dee kritt dann net d'Prime d'encouragement vum zweete Cycle. Een deen awer am September seng zweet Sess huet, dee fällt dann no dem 1. Juli. Ass dat dann net kontradiktöresch, dass een, deen et

am Juni packt, déi Prim net kritt, an deem am September se awer kritt?

Mme Erna Hennicot-Schoepges, Ministre de la Culture, de l'Enseignement supérieur et de la Recherche.- Et ass een Datum. Ech ka keng aner Indikatioun ginn, wéi déi, déi an den Texter vum Gesetz ze liese sinn. D'Mise en vigueur ass vum 1. Juli vun dësem Joer un. De Paragraph 2 vun deem betreffenden Artikel gesäit vir, dass och déi Leit, déi en cours vun engem Studium sinn, kënnen vun deenen Dispositiounen profitieren.

Da géif ech op déi Beräicher kommen, déi sech mat de Prozentsätz vun de Lëtzebuerger Studenten beschäftegen. Mir hunn eng Verduebelung gehat. D'Erklärung, firwat net méi Studenten op d'Uni ginn, déi ass vielfälteg. Ech denken net, dass mer duerch méi genee Analysen vun der Soziologie vun deene Studenten, déi richteg Konklusiounen kënnen zéien, well net ëmmer ass deen ee Student gläichzesetze mat deem anere Student, dee wuel finanziell d'Méiglechkeet huet, mä deem awer vun doheem net encouragéiert gëtt. Do ass d'Erklärung net um finanzielle Plang ze sichen a ganz sécher och net bei de Bähëllef vum Stat.

Ech ginn dem Här Hoffmann Recht, dass ee mat der Motivatioun ganz fréi muss ufänken. Ech denken, dass de sozialen Ennvironnement vun der Famill am Ganzen zielt, an dass mer hei kënnen dat Beschta maachen, fir finanziell auszegläichen, wann d'Eltere kee Studium erméigleche kënnen.

Den Här Henckes huet da gemengt, et misst een op de Steuerwee goen, an do d'Käschte fir Studiën kënnen ofsetzen. Ech wëll hei keng Diskussioun untrieden, déi eng ganz aner ass, well et iwwer de Steuerwee nach vill Bemerkungen ze maache gëtt, an déi éischt Diskussioun, déi mir an deem Zesummenhank wäerte musse féieren, ass, wann d'Titren 2 an 3 vum Gesetz iwwert d'Weiderbildung gemaach ginn.

Den Här Garcia freet a senger Motioun eng Reglementatioun fir den Enseignement à distance. Den Här Fayot freet eng Reglementatioun fir den Apprentissage tout au long de la vie. Alles dat hängk zesummen, an ech sinn der Meinung, wann d'Auteurs vun deene Motiounen d'accord sinn, fir d'Motiounen 1 a 5 nach eng Kéier an der Kommissioun ze behandelen an ze kucken, wéi mir eng gemeinsam Strategie do kënnen maachen, fir net a Kontradiktioun ze komme mat deem, wat mer iwwer d'Gesetz vun der Weiterbildung an d'Ausweitung op den 2. an 3. Titre beschléissen.

Mir hunn an eiser Regierungserklärung iwwregens decidéiert, eist Steiergesetz ze vereinfachen. Et ass eng Demande do, fir munch Abattementer ofzeschaffen. An deem Sënn wier et net gutt, wann elo ee Regierungsmitglied géif do eng Bande à part maachen an nei Abattementer unhuelen.

Dat gesot, Här President, géif ech alle Participanten vun dëser Diskussioun merci soen. Et ass e Schrëtt, et wäert awer ganz sécher ee wichtege Schrëtt sinn um Wee vun enger echter Héichschoulpolitik hei an eisem Land.

Ech wier frou, wann d'Chamber mat enger grousser Majoritéit oder à l'unanimité dëse Projet géif stëmmen.

M. le Président.- Den Här Hoffmann wëllt nach eng Fro stellen.

M. André Hoffmann (déi Lénk).- Ech wëllt just nach ganz kuerz eng Bemierkung maachen. Däerf ech dat?

M. le Président.- Jo!

M. André Hoffmann (déi Lénk).- Et war mir virdrun net ganz kloer - an ech mengen, ech sinn net deen Een-zegen, well ech hat e bëssche ronderëm gefrot, - déi Fro vum Rapport tëschent Bourse a Prêt. D'Mme Minister huet elo eng däitlech Äntwert ginn, dass an deem Projet de règlement grand-ducal, sou wéi en elo virgesinn ass, och nach ëmmer nëmmen de Maximum vun der Bourse ka 50% bedroe vun deem, wat als globale Maximum vun der Hëllef festgesat ass.

Ech wëll hei just hefteg derfir plaidéieren, dass mer dee Règlement grand-ducal ëmänneren, an dass mer dra virgesinn, dass bis zu enger gewëssener Akommesgrenz dee Rapport Bourse-Prêt soll 100% sinn. Dat heescht also, dass dee Maximum zu 100%, oder sou ähnlech, ofgedeckt ka ginn duerch Bourse non remboursable, an dass dann eréischt, vun deem Seuil vun Akommes un, déi Proportioun tëschent Prêt a Bourse entspreichend dem Akommes an de soziale Situatiounen differenzéiert gëtt.

Ech huelen elo e Beispill, dat vläicht e bëssche krass klénkt, mä awer eppes ausseet: Mir hunn elo e Maximum u Bedarf - ech hunn dat elo net iwwerpréift -, dee läit bei à peu près 30.000 Frang de Mount. Dat ass, wat mir soen, wat e Student géif brauchen. Dat heescht an anere Wieder, dass awer eng Famill muss 15.000 Frang bäileeën ausser Prêt. A grad bei engem Prêt schreckt awer vläicht e Kand aus engem schwache Milieu nach méi zréck wéi en anert, well et och net weess, wéi et mat de Studie weitergeet a sou virun. Wann et dee Prêt net ophëlt, dann hätt d'Famill nach ëmmer 15.000 Frang bäieleen. 15.000 Frang fir e klengt Akommes, dat ass relativ vill.

Also nach eng Kéier: Ech géif ganz hefteg derfir plaidéieren, dass dee Règlement grand-ducal - well d'Gesetz léisst dat zou a seet näischt Prezises doriwwer aus -, géif an deem Sënn ëmgeännert ginn, dass bis zu engem gewëssenen Akommes un déi 100% vum Maximum vun der Aide iwwer Bourse kéinte gedeckt ginn. Merci!

M. le Président.- Den Här Fayot huet och nach d'Wuert gefrot.

M. Ben Fayot (LSAP).- Här President, ech wollt op déi Suggestioun vun der Mme Minister agoen, fir meng Motioun - den Här Garcia muss jo fir seng schwätzen - an d'Kommissioun zréckzeverweisen.

Ech hunn am Prinzip näischt dergéint, fir dat an der Kommissioun nach eng Kéier ze diskutéieren, mä ech wëll awer hei an aller Däitlechkeet soen, dass ech net verstinn, dass d'Regierung sech dergéint stäipt bei deene Leit, déi zum Beispill hallef Zäit schaffen an déi aner Zäit

Universitätsstudie verfolgen, an die bis 1999 immer von der Finanzhilfe konnte profitieren und seit 1999 nicht mehr, aus der Ursache, dass das Gesetz von 1977, also auch das von 1999, nämlich Studie von Kanner und Relationen mit ihren Eltern berücksichtigt. Die Ministerin hat es also nur gesagt, dass es möglich wäre, am Ende von dem Gesetz auch die Onafhängegheit vom Student mit einem Betrecht zu zeigen, so dass auch wirklich die Regierung, die Verwaltung gibt bieten, das so auch eine Kasse zu reconsiderieren.

Es versteht sich, natürlich, dass das, was von 1977 bis 1999 gelaufen ist, dann auf einmal nicht mehr möglich ist. Also am Ende von diesem Gesetz ist es so, dass theoretisch möglich ist, was die Ministerin es das gesagt hat, auch es gibt wirklich drop insistieren, dass die Verwaltung so ihre Praxis gibt reconsiderieren, für dass die Leit, die Studie machen an eine gewisse Sacrifice machen an als Berufstätige Universitätsstudie verfolgen, an der Befreiung von dem Gesetz können kommen, was so eine gewisse Schwierigkeit besteht, für das zu machen.

Das gesagt, ist natürlich mit der Ministerin d'accord, dass man die ganze Problematik vom Apprentissage tout au long de la vie kennen an der Kommission nach eine Kasse kucken. Wann es auch alle die Sachen heißen kann, die der Mitter heil gesagt gibt, da ist es auch wirklich eine gewisse Ursache, für die Leit aus dem Befreiung von dem Gesetz auszuschließen. Es gibt, was gesagt, nach eine Kasse der Regierung an die Verwaltung bieten, für dass das seriös zu überlegen.

M. le Président.- Da komme ich also zur Lecture von den Artikeln vom Projekt de loi 4562 zu stimmen drüber.

Lecture du texte du projet de loi (par M. Jean Asselborn)

Die Artikel 1 bis 12 sind gelesen und genehmigt.

Mit uns zum Abstimmungsgegenstand des Projekt de loi 4562.

Vote sur l'ensemble du projet de loi et dispense du second vote constitutionnel

Die für das Projekt sind stimmend mit Ja, die anderen mit Nein oder Enthalt.

Das Projekt de loi ist mit 57 Stimmen einstimmig genehmigt.

Ont voté oui: MM. Willy Bourg, Lucien Clement (par M. Fred Sunnen), Marcel Glesener, Jean-Marie Halsdorf (par M. Laurent Mosar), Norbert Haupt, Ady Jung, Nico Loes (par M. Norbert Haupt), Paul-Henri Meyers, Mme Marie-Josée Meyers-Frank (par M. Patrick Santer), M. Laurent Mosar, Mme Ferny Nicklaus-Faber (par Mme Nelly Stein), MM. Patrick Santer, Marco Schank (par M. Paul-Henri Meyers), Jean Spautz, Mme Nelly Stein, MM. Nicolas Strotz, Fred Sunnen, Lucien Weiler et Claude Wiseler;

Mme Simone Beissel, MM. Jeannot Belling (par M. Xavier Bettel), Xavier Bettel, Niki Bettendorf, Emile

Calmes (par M. Marco Schroell), Mme Agny Durdu (par M. Claude Meisch), MM. Gusty Graas, Paul Helminger (par M. John Schummer), Alexandre Krieps, Claude Meisch, Mme Maggy Nagel (par M. Gusty Graas), MM. Jean-Paul Rippinger, Marco Schroell, John Schummer et Théo Stendebach;

MM. Jean Asselborn, Alex Bodry (par M. Mars Di Bartolomeo), Mme Mady Delvaux-Stehres, M. Mars Di Bartolomeo, Mme Lydie Err (par M. Ben Fayot), MM. Ben Fayot, Jeannot Krecké, Lucien Lux, Mme Lydia Mutsch, MM. Jos Scheuer, Georges Wohlfart (par M. Jean Asselborn) et Marc Zanussi;

MM. Jean Colombero (par M. Gast Gibéryen), Gast Gibéryen, Fernand Greisen (par M. Aly Jaerling), Jacques-Yves Henckes, Aly Jaerling et Jean-Pierre Koepp (par M. Jacques-Yves Henckes);

MM. François Bausch, Robert Garcia, Camille Gira et Mme Renée Wagener;

M. André Hoffmann.

Ass der Chamber d'accord, für die Dispens vom zweiten Abstimmungsgegenstand?

(Assentiment)

Es ist einstimmig entschieden.

Motions

Da komme ich zur Abstimmung über die Motiounen. Ich bitte Sie schriftlich zu bezeugen an die Ministerin hat die Stellungnahme abgelesen.

Es ist d'Proposition gemacht worden, für die Motioun 1 vom Herrn Fayot an die Motioun 5 vom Herrn Garcia an die Kommission zurückzuweisen. Soll der domat verstanden?

(Assentiment)

Dann ist es einstimmig entschieden.

Da komme ich zur Motioun 2.

(Interruptions)

M. Jacques-Yves Henckes (ADR). - Mir freuen die elektronische Abstimmung für die drei Motiounen.

M. Jean-Paul Rippinger (DP). - Herr Präsident, es wollte auch etwas dazu sein.

M. le Président. - Losse ich also der Reihe nach folgen! Ich bitte Sie die elektronische Abstimmung für die Motiounen 2, 3 und 4?

(Assentiment)

Das ist notiert!

Den Herrn Rippinger hat die Würde.

M. Jean-Paul Rippinger (DP). - Herr Präsident, ich bitte Sie die Hären, mir sie selbstverständlich d'accord.

cord mat der Mme Minister, wa si seet, si géif déi Motioun 2 net unhuelen, sou wéi se rédigiéiert ass.

Dat ass och normal, well mat där Motioun hei géif een der Regierung d'Hand forcéieren, eng isoléiert Measure ze huelen. Dofir hate mir eventuell geduecht ze proposéieren - mir wëssen zwar net, ob den Auteur vun der Motioun dat unhëlt, ech weess och net, ob d'Mme Minister domat d'accord ass -: "invite le Gouvernement à étudier dans le cadre de la réforme fiscale la possibilité d'une déduction fiscale à titre de charges extraordinaires" net "de tous les frais", mä "des frais de scolarité".

Et kann een dat hei net als Measure isolée huelen, se aus hirem ganze Kontext eraushuelen. Mä et wär d'Méiglechkeet ze studéieren, ob déi Possibilitéit géif bestoen, fir op dee Wee do ze goen. Dat wär kengem d'Hand forcéiert, fir dat sou ëmzeänneren, wann d'Mme Minister d'accord ass. Wann net, da stëmme mer natierlech géint déi Motioun.

M. le Président.- Den Här Krecké huet d'Wuert, dono den Här Hoffmann an dann den Här Bausch.

M. Jeannot Krecké (LSAP).- Här President, ech hu meng stäerkste Bedenke fir déi Measure, déi hei préconiséiert ass.

Firwat? Well et net gerecht ass.

Une voix.- Jo!

M. Jeannot Krecké (LSAP).- Hei kënnen jo da just déi Leit ofschreiwen, déi éischters Steiere bezuelen, an hunn och am meeschten dervun déi, déi vill Steiere bezuelen. Or, dat hei ass en elementaart Recht, wat een eis Bierger muss zouschreiwen, dass se d'Méiglechkeet kréien, fir hire Kanner eng Ausbildung op enger Uni ze erlaben. Also soll een hinnen eppes zoukomme loossen, fir datt dat méiglech ass. Dat kann een net bei eiser Struktur vun eiser Gesetzgebung iwwer de Steuerwee maachen. Dat ass foncièrement ongerecht.

Ech géif wierklech dervun ofroden, op deen do Wee ze goen, a mir wäerten déi Motioun och mat Sécherheet net stëmmen.

M. le Président.- Den Här Hoffmann.

M. André Hoffmann (déi Lénk).- Ech wollt eigentlech genau datselwecht soe wéi den Här Krecké. Ech wäert déi Motioun och net stëmmen, well, a mengen Aen, all Abatement den Effekt vu sozialer Ongerechtegkeet huet.

M. le Président.- Den Här Bausch.

M. François Bausch (DÉI GRÉNG).- Et ass ëmmer schlecht, wann een als leschten dru kënnt, well dann hunn déi aner meeschtens schonn eng ganz Rei Saache gesot.

Ech schlësse mech deenen zwee Virriedner un. Ech wëll awer soen, dass d'Motioun 3 eis méi interessant schéngt ze sinn, an et sollt een driwwer diskutéieren, ob een net speziell Aiden, sougenannten Allocations de logement mensuelles, sollt virgesi fir Studenten.

Allerdéngs sinn ech net dermat d'accord, wann dat einfach sou generaliséiert soll agefouert ginn. Mir schéngt et evident ze sinn, dat ze kucke bei verschiddene Revenuskategorien, awer net wann ee Ménage ee ganz héije Revenu huet. Do schéngt et mer e bësschen zweifelhaft, fir sou Saachen anzeféieren.

M. le Président.- Den Här Henckes huet d'Wuert nach gefrot.

M. Jacques-Yves Henckes (ADR).- Här President, Dir Dammen an Dir Hären, ech hu vun där Suggestioun, déi hei vum Fraktiounspresident vun der Demokratescher Partei formuléiert ginn ass, Kenntnis geholl an ech sinn och mat deem neie Libellé d'accord.

Ech weess, datt een dat soll an engem globale Kontext gesinn, dofir hat ech och versicht, net iwwert de Wee vun Abatementen ze goe mä iwwert d'Charge extraordinaire. Dorop kann een nach eng Kéier zrëckkommen.

Wat déi Remarque vun deenen anere Virriedner ugeet, wëll ech soen, datt wann een d'Déductibilité fiscale virgesäit an op där anerer Säit Subsiden, da si mir bien entendu d'accord, fir deene Leit, déi keng Steiere bezuelen, iwwer Subsiden entgéintzekommen, mä datt een de Prinzip selwer an d'Modalitéit vun der Charge extraordinaire fir déi aner Leit virgesäit mat notament mëttlerem Akommes. Dat ass awer de Gros vun de Leit, déi augenblécklech hir Kanner op d'Unie schécken, an deene misst mer iwwert dese Wee entgéintkommen, an dofir dës Motioun.

Wat déi drëtt Motioun ugeet, wollt ech nach eng Kéier präziséieren, dass a Frankräich, wou ech gemierkt hunn, dass ganz vill Lëtzebuerger Studente vun der franséischer Gesetzgebung profitéieren, augenblécklech do déi Allocation de logement ouni Condition de revenu accordéiert gëtt. Déi Lëtzebuerger Studenten, déi op de Wee gi fir sou eng Allocation de logement a Frankräich ze froen an déi hei net op déi verschidden Indemnitéiten oder Boursë verzichten, wieren deen Ablack net méi berechtigt, déi a Frankräich ze froen. Dofir wier et richteg a wichteg, datt déi Lëtzebuerger Regierung géif kucken, fir hei eng kloer Situatioun ze schafen. Dofir hunn ech versicht, dës Motioun anzébréngen.

M. le Président.- Da stëmme mer elo of iwwer d'Motioun 2

M. Jos Scheuer (LSAP).- Mat der Modifikatioun wéi den Här Rippinger se proposéiert huet?

M. le Président.- D'Mme Minister freet d'Wuert.

Mme Erna Hennicot-Schoepges, Ministre de la Culture, de l'Enseignement supérieur et de la Recherche.- Den Här Rippinger hat eng Proposition gemaach, fir dës Motioun ze modifizéieren.

Ech muss leider drop hiweisen, dass mer eis och domat a Contradictioun befanne mat deem, wat mer an der Regierungserklärung zesummen ofgemaach hunn. Mir hu gesot, mir géifen d'Abatementen an de Steiergesetz aschränken a souguer eis Steuerreform an deem

Sënn organiséieren, datt mer dat maachen. Ech géif do eng Contradictioun gesinn, dofir, Här Rippinger, kann ech och net mat der Modifikatioun d'accord sinn.

M. Jean-Paul Rippinger (DP).- Mir maachen natierlech näischt, wat géint dat géif goen,...

(Hilarité)

...wat am Accord de coalition steet. Ech hunn awer hei nëmme proposéiert: "à étudier la possibilité". Méi hunn ech net gesot. Ech hunn awer och gesot, wann d'Mme Minister d'Motioun net géif unhuelen, da géife mer dergéint stëmmen. Also stëmmen mer dergéint. Sou einfach ass et.

(Interruptions)

M. le Président.- Den Här Glesener huet d'Wuert.

M. Marcel Glesener (CSV).- Här President, mir stëmmen och géint déi Motioun.

Une voix.- A firwat?

(Interruptions diverses)

M. Jacques-Yves Henckes (ADR).- Mir wëllen dann den Text originaire oprechterhalen, wéi mir en abruecht hunn.

M. le Président.- Wëllt Der se dann elo elektronesch ofgelehnt kréien oder par main levée?

(Hilarité générale)

De Vote fänkt un!

Vote

Déi fir d'Motioun 2 si stëmmen mat Jo, déi aner mat Neen oder enthalen sech.

D'Motioun ass mat 6 Jo-Stëmmen an 53 Nee-Stëmmen ofgelehnt.

Ont voté oui: MM. Jean Colombero (par M. Jacques-Yves Henckes), Gast Gibéryen, Fernand Greisen (par M. Aly Jaerling), Jacques-Yves Henckes, Aly Jaerling et Jean-Pierre Koepp (par M. Gast Gibéryen).

Ont voté non: MM. Willy Bourg, Lucien Clement, Marcel Glesener, Jean-Marie Halsdorf, Norbert Haupt, Ady Jung, Nico Loes (par M. Nicolas Strotz), Paul-Henri Meyers, Mme Marie-Josée Meyers-Frank (par M. Patrick Santer), M. Laurent Mosar, Mme Ferny Nicklaus-Faber (par Mme Nelly Stein), MM. Patrick Santer, Marco Schank (par M. Willy Bourg), Jean Spautz, Mme Nelly Stein, MM. Nicolas Strotz, Fred Sunnen, Lucien Weiler (par M. Claude Wiseler) et Claude Wiseler;

Mme Simone Beissel, MM. Jeannot Belling (par M. Xavier Bettel), Xavier Bettel, Niki Bettendorf, Emile Calmes (par M. Marco Schroell), Mme Agny Durdu (par M. Claude Meisch), MM. Gusty Graas, Paul Helminger (par M. John Schummer), Alexandre Krieps, Claude

Meisch, Mme Maggy Nagel (par M. Gusty Graas), MM. Jean-Paul Rippinger, Marco Schroell, John Schummer et Théo Stendebach;

MM. Jean Asselborn, Alex Bodry (par M. Ben Fayot), Mme Mady Delvaux-Stehres, M. Mars Di Bartolomeo, Mme Lydie Err (par M. Jos Scheuer), MM. Ben Fayot, Jean-Pierre Klein (par M. Mars Di Bartolomeo), Jeannot Krecké, Lucien Lux, Mme Lydia Mutsch, MM. Jos Scheuer, Georges Wohlfart (par M. Jeannot Krecké) et Marc Zanussi;

MM. François Bausch, Robert Garcia, Camille Gira, Jean Huss (par M. Camille Gira) et Mme Renée Wagener (par M. François Bausch);

M. André Hoffmann.

Elo komme mir zu der Motioun 3. Ass och do de Vote électronique verlaangt?

(Assentiment)

D'Mme Minister huet d'Wuert zu der Motioun 3.

Mme Erna Hennicot-Schoepges, Ministre de la Culture, de l'Enseignement supérieur et de la Recherche.- Am Kader vun der Berechnung vun der Aide financière droe mir deem Käschtepunkt Rechnung, deen an de jee-weilege Stied berechent gëtt. Am Kader vun deem Reglement gëtt och de Fräe vum Logement Rechnung gedroen. Ech mengen dat hei géif iwwert dee Kader erausgoen. Wann den Här Henckes schonn de Verglach mat de Fransouse mécht, da wëll ech him soen, datt d'Aide financière déi mir ginn, dat Duebelt vun deem ass, wat e franséische Student kritt.

M. le Président.- Mir stëmmen dann och iwwert déi Motioun of.

Vote

Déi fir d'Motioun 3 sinn, stëmmen mat Jo, déi aner mat Neen oder enthalen sech.

D'Motioun 3 ass verworfen mat 47 Nee-Stëmmen, 5 Jo-Stëmmen a 5 Abstentiounen.

Ont voté oui: MM. Jean Colombero (par M. Gast Gibéryen), Gast Gibéryen, Fernand Greisen (par M. Aly Jaerling), Jacques-Yves Henckes et Aly Jaerling.

Ont voté non: MM. Willy Bourg, Lucien Clement, Marcel Glesener, Jean-Marie Halsdorf (par M. Fred Sunnen), Norbert Haupt, Ady Jung, Nico Loes (par M. Norbert Haupt), Paul-Henri Meyers, Mme Marie-Josée Meyers-Frank (par M. Patrick Santer), M. Laurent Mosar, Mme Ferny Nicklaus-Faber (par M. Laurent Mosar), MM. Patrick Santer, Marco Schank (par M. Willy Bourg), Jean Spautz, Mme Nelly Stein, MM. Nicolas Strotz, Fred Sunnen, Lucien Weiler (par M. Claude Wiseler) et Claude Wiseler;

Mme Simone Beissel, MM. Jeannot Belling (par M. Xavier Bettel), Xavier Bettel, Niki Bettendorf, Emile Calmes (par M. Claude Meisch), Mme Agny Durdu (par

M. Marco Schroell), MM. Gusty Graas, Paul Helming (par M. John Schummer), Alexandre Krieps, Claude Meisch, Mme Maggy Nagel (par M. Alexandre Krieps), MM. Jean-Paul Rippinger et Théo Stendebach;

MM. Jean Asselborn, Alex Bodry (par M. Ben Fayot), Mme Mady Delvaux-Stehres, M. Mars Di Bartolomeo, Mme Lydie Err (par M. Jos Scheuer), MM. Ben Fayot, Jean-Pierre Klein (par M. Jean Asselborn), Jeannot Krecké, Lucien Lux, Mme Lydia Mutsch, MM. Jos Scheuer, Georges Wohlfart (par M. Jeannot Krecké) et Marc Zanussi.

Se sont abstenus: MM. François Bausch, Robert Garcia, Camille Gira et Mme Renée Wagener;

M. André Hoffmann.

Da komme mer elo zu der Motioun 4.

Vote

Déi fir d'Motioun 4 sinn, stëmme mat Jo, déi aner mat Neen oder enthalte sech.

D'Motioun 4 ass verworf mat 44 Nee-Stëmmen, 11 Jo-Stëmmen an enger Abstentioun.

Ont voté oui: MM. Jean Colombero (par M. Gast Gibéryen), Gast Gibéryen, Fernand Greisen (par M. Aly Jaerling), Jacques-Yves Henckes, Aly Jaerling et Jean-Pierre Koepp (par M. Jacques-Yves Henckes);

MM. François Bausch, Robert Garcia, Camille Gira, Jean Huss (par M. François Bausch) et Mme Renée Wagener.

Ont voté non: MM. Willy Bourg, Lucien Clement, Marcel Glesener, Jean-Marie Halsdorf (par M. Willy Bourg), Norbert Hauptert, Ady Jung, Paul-Henri Meyers, Mme Marie-Josée Meyers-Frank (par M. Patrick Santer), M. Laurent Mosar, Mme Ferny Nicklaus-Faber (par Mme Nelly Stein), MM. Patrick Santer, Marco Schank (par M. Paul-Henri Meyers), Jean Spautz, Mme Nelly Stein, MM. Nicolas Strotz, Fred Sunnen, Lucien Weiler (par M. Nicolas Strotz) et Claude Wiseler;

Mme Simone Beissel, MM. Jeannot Belling (par M. Xavier Bettel), Xavier Bettel, Niki Bettendorf (par M. Claude Meisch), Gusty Graas, Paul Helming (par M. John Schummer), Alexandre Krieps, Claude Meisch, Mme Maggy Nagel (par M. Gusty Graas), MM. Jean-Paul Rippinger, Marco Schroell, John Schummer et Théo Stendebach;

MM. Jean Asselborn, Alex Bodry (par M. Jos Scheuer), Mme Mady Delvaux-Stehres, M. Mars Di Bartolomeo, Mme Lydie Err (par M. Mars Di Bartolomeo), MM. Ben Fayot, Jean-Pierre Klein (par M. Jean Asselborn), Jeannot Krecké, Lucien Lux, Mme Lydia Mutsch, MM. Jos Scheuer, Georges Wohlfart (par M. Jeannot Krecké) et Marc Zanussi.

S'est abstenu: M. André Hoffmann.

Domat wärend d'Motiounen ofgeschloss a mir kéimen zu eisem nächste Punkt um Ordre du jour. Dat ass de Projet de loi 4638 iwwert d'Entsuerung vum Asbest am Gebai vun der europäescher Cour de Justice um Kierchbierg.

D'Wuert huet elo de Rapporteur vum Projet de loi, den honorablen Här Willy Bourg.

4. Projet de loi 4638 relatif au désamiantage du Palais de la Cour de Justice des Communautés européennes à Luxembourg-Kirchberg

Rapport de la Commission des Travaux publics

M. Willy Bourg (CSV), rapporteur.- Här President, Dir Dammen an Dir Hären, de Gesetzesprojet N° 4638 iwwert d'Décontaminatioun vum Palais de Justice vum europäesche Geriichtshaff ass ee vun deene Projeten, déi a wierklech kuerzer Zäit - manner wéi 3 Méint - den Instanzewee duerchlaf hunn. Dëst kann een nëmme begrëssen. Schliesslech mussen a sollen d'Aarbechten, déi dëst Gesetz virgesäit, esou schnell wéi méiglech an Ugrëff kënnen geholl ginn.

Dëst Gebai vum europäesche Geriichtshaff ass Ufanks de 70er Jore gebaut ginn. Déi speziell Metallkonstruktioun, déi ganz schnell no baussen als Wärrzeeche vun dëser Institutioun bekannt gouf, huet awer eng Rei Nodeeler. Een dovun ass déi schlecht Resistenz géintwärt dem Feier. Dofir war an der Zäit eng Isolatioun mat Sprëtzasbest gemaach ginn.

Den Asbest ass jo laang Zäit weinst senger verschidene positiven Eegeschafte als Wonnermaterial bezeechent ginn. Den Asbest ass feier- an hëtzeresistent, huet eng ganz héich chemesch Stabilitéit, an ass besonnesch gutt géiegent fir ze isoléieren. Dofir ass den Asbest Enn de 60er, Ufanks de 70er Jore vill an der Konstruktioun agesat ginn, wat sech leider ganz geschwënn als kapitale Feeler erausgestallt huet.

Zu dëser Zäit waren déi kribberregend Eegeschafte vum Asbest nämlech nach net bekannt.

Eng ganz Rei Gebaier, déi am virgenannten Zäitraum gebaut goufen, hunn an der Zwëschenzäit weinst der Presenz vum Asbest misse fir vill Suen décontaminéiert ginn. Dëst ass souwuel hei zu Lëtzebuerg, wéi och am Ausland de Fall gewiescht. Eent vun dëse Gebaier war de Bâtiment Berlaymont, de Sëtz vun der Europäescher Kommissioun zu Bréissel. Dëst Gebai ass besonnesch an d'Schlagzeile komm, well d'Décontaminatiounsarbechte mat enger gewësser Noléissegkeet duerchgefouert goufen.

De Verlaf vun dësen Aarbechten huet d'Personal vum europäesche Geriichtshaff dozou verleet, fir mat Nodrock op de Problem vum Palais de Justice opmierksam ze maachen an eng méiglechst schnell Léisung ze verlaangen.

Obschonn regelméisseg Analysen am Palais vum europäesche Geriichtshaff gewisen hunn, datt den Taux vum Asbest an der Loft ënnert dem zoulässegen Taux läit